


KUBAKA MIELO YA MBENI

 Mbote, na beno nionso. Mpe mu ke na kiese na kuvutuka diaka na suka yayi na tabernacle, samu na kusambila samu na bambevo bubu yayi. Ya kele, na mumesanu, beto ke mekaka na kukwisa awa, konso ntangu, mpe—mpe samu na kusambila samu na bambevo yina ke katuka na bisika ya mutindu na mutindu, samu na bisambu.

Mpe ntangu yayi beto ke kwenda ntama mingi ve, ntangu yayi, samu na balukutakanu ya Californie mpe ya Côte Ouest. Mpe ya kieleka beto ke lomba bisambu ya beno, ti Nzambi ya Mazulu ke vwanda na mawa ya beto kuna mpe ke pesa beto balukutakanu ya nene.

Mu me vutuka kaka, mazono, to mazono na nkokila, mu zolaka tuba, na nsukinina. Mpe mazono vwandaka mosi ya . . . Mbote, mazusi, mpe mazono, vwandaka mosi ya bilumbu ya nene ya lubambuku ya luzingu ya munu. Kuna, mu me zaba kaka bantu zole, to tatu, na kati ya kivinga yina vwandaka bambangi ya nkwezulu ya Mfumu, mazono. Mpe kima mosi ya nene, ya kitoko me salama, yina mu ke na ntangu ve na suka yayi na kutuba na beno. Kasi mu banza Lumingu ke kwisa na suka, na ntwala beto kwenda, mu lendaka vwanda na ntangu, na kati ya Nsangu, samu na ku—kutuba na beno. Kana Mfumu kuzola, mu ke kwisa, kaka samu na kusambila samu na bambevo, na Lumingu na suka. Beto ke zola kukwenda pene ya midi, kana ya lendaka salama, samu na lukutakanu ya San Jose na San Jose, na Californie. Mpe kana beno me zaba bantu yina ke vwandaka na kizunga, na Côte Ouest kuna, ya ke vwanda, beto ke kwikila, ya ke vwanda mu banza ngunga yina mu vwandaka vingila, kubanda ntama, nsobolo ya ministere ya munu yina ke na kwisa. Mpe ya me kuma pene mingi ti, mu banzaka ti ya zolaka salama mazono. Mpe mu ke kwikila ti ya ke vwanda kaka na ntangu yayi, mpe ya ke vwanda na zulu ya bima nionso yina beto me monaka to beto me kuwaka, ntete ve. Ntangu yayi, beno bambuka moyo, ti ya kele **MUTINDU ME TUBA MFUMU**. Beno me mona? Mpe na yina beto ke na kuvingila kaka yawu, na ntangu nyonso.

Mpe beto ke zola kusala lukutakanu ntangu yayi na foire. Mu ke kwikila ti ya kele mbote, mutindu yina ve, Gene? Mpe na foire ya San Jose, na Californie. Mpe ya ke vwanda lukutakanu ya bilumbu kumi, kubanda na kilumbu ya 20, tii na kilumbu ya 29, na—na San Jose. Ntangu yayi, beno bambuka kaka moyo na beto na bisambu.

Ntangu yayi beto kele, kana beto ke basika na ntangu, pene ya ngunga mosi na ndambu ntangu yayi, ti beto ke banda

balukutakanu ya beto ya bisambu samu na bambevo mpe samu na kulonga Ndinga. Mu me soola, na suka yayi, mwa kitini ya Masonuku, mu ke zonzila na bisika zole, na Biblia.

Kasi ntete beto zonza, beto kulumusa kaka bayintu ya beto mwa ntangu fioti, samu na kisambu.

² Nzambi ya kifuluka na lemvo, Beto ke belama na kukikulumusa nionso na kiti ya Nge ya lemvo na suka yayi, mutindu bana yina kele ya kulunga ve, kasi beto ke kwisa na lukwikilu ya kuvedila na Nzambi, yina me pesa beto na nzila ya Mpeve-Santu, mpe na Mwandulu ya Yandi ya ntangu nionso na beto. Mpe na nsilulu ya Mfumu Yesu, ti kana beto ke kwisa na kukikulumusa nionso mpe beto ke lomba konso kima yina na Nkumbu ya Yandi, beto ke kuzwa lombilu. Na yina, beto ke zola ve kutala na mangolo ya beto, samu ti beto kele na ata mosi ve, kasi beto ke tala na mangolo ya Calvaire, kisika lemvo ya beto pesamaka na beto ya mpamba na nzila ya Mwana ya Nzambi. Mpe na mpasi beto lenda kanga mansanga yina zola kubasika na beto, ntangu beto ke banza na beto, bantu ya kulunga ve, mpe wapi mutindu ti na lemvo ya Yandi kuna na Calvaire Yandi salaka yina samu na beto, samu na kunata beto pene-pene mingi na Nzambi, na kimpangi mpe. Mpe ntangu yayi beto kele bana-babakala mpe bana-bakento ya Yandi.

³ Mpe beto me kwisa na suka yayi, Mfumu, na nsi ya mwa muludi yayi, samu na kukipesa beto mosi, samu na kisalu, na kufungana masunu ya beto, mpe—mpe na bisambu ya Kinzambi. Beto ke tula kivuvu ti Nge ke vwanda na beto mpe ke pesa beto vision ya kimpeve ya nkwizulu ya Nge yina me belama, ti beto lendaka yidika bantima ya beto konso kilumbu samu na diambu yina ya nene beto ke vingila kubanda bamvula mafunda. Ya kieleka yinza ya muvimba ke na kudila ngolo, ke na kuboka samu na luvukulu. Mpe bampeve ya beto na kati ya beto, Mfumu, ke na kundima ntangu nionso, ti, “Beto kele bizieti mpe banzenza, mpe yayi kele mbanza ya beto ve, kasi beto ke sosa Mbanza yina Mutungi mpe Kiyidiki kele Nzambi.” Beto ke vingila ntangu yina ya nene ke kwisa.

⁴ Mfumu, beto ke zola kubambuka moyo na balukutakanu yayi, ntangu beto me vukana awa, beto ke sambila samu na bana ya Nge yina kele ya kubela mpe na mpasi. Mpe beto ke lomba ti Nge ke kukutana na beto bubu yayi kieleka na mutindu yankaka, samu na kubelula bimbevo nionso mpe maladi nionso na kati ya beto. Mpe ya lendaka vwanda, Mfumu, ti nsilulu yayi yina mu vwandaka tubila na ntangu me luta, na kati ya lukutakanu na Nge kuna mazono, kaka na manima ya kilumbu, mpe wapi mutindu Nge me siamisa diaka yawu mbala na mbala. Mpe beto ke mona ti ngunga yango me belama mingi. Mpe ti yayi vwanda kilumbu yango, Mfumu, yina ya ke salama, yina Nge ke soba ministere, Mfumu, na kima yina ke vwanda mbote mingi samu na bantu ya Nge.

5 Mpe ntangu yayi, Tata Nzambi, beto ke sambila kaka ve samu na bayayi kele awa, kasi samu na bayina kele na yinza ya muvimba, bayina kele na nsatu, ya nyonso zole ya kimpeve mpe ya nzutu. Pesa bawu, O Mfumu, bansatu ya bantima ya bawu, samu bana ya Nge ke na bamvita na bilumbu yayi. Nkwamusu ya mbeni kele ngolo mingi, kasi Nge kele kulutula ngolo. Samu ti ya kele ya kusonama, “Yandi yina kele na kati ya beno kele ngolo mingi kulutula yina kele na yinza.” Na nzila ya yayi beto ke kununga. Tuba na beto na nzila ya Ndinga ya Nge yina kele ya kusonama. Mpe ntangu beto ke kwenda na suka yayi, bika beto tuba mutindu bayina vwandaka kwenda na Emmaüs, “Bantima ya beto vwandaka pela ve ntangu Yandi vwandaka tuba na beto na nzila?” Beto ke lomba yawu na Nkumbu ya Yesu, Yina pesaka nsilulu. Amen.

6 Mu ke tanga ntangu yayi na bisika zole na kati ya Buku ya Genèse. Mosi ya yawu kele na kapu ya 24, kubanda na nzila ya 56, beto ke tanga mutindu yayi.

Mpe yandi tubaka na bawu, Beno kanga munu ve, samu MFUMU me sadisa munu na nzietolo ya munu; beno bika munu kukwenda na mfumu ya munu.

Mpe bawu tubaka, Beto ke bokila mwana-kento, mpe beto ke yufula yina yandi ke banza.

Mpe ba bokilaka Rebekah, mpe ba tubaka na yandi, Nge ke kwenda na bakala yayi? Mpe yandi tubaka, Mu ke kwenda.

Mpe ba pesaka muswa na Rebekah na mpa- . . . mpangi ya bawu ya kento, mpe ndesi ya yandi, mpe kisadi ya Abraham, . . .

Mpe ba sakumunaka Rebekah, mpe tubaka na yandi, Nge kele mpangi ya beto ya kento, nge ke vwanda mama ya mafunda ya mafuku, mpe nkuna ya nge ke baka mwelo ya bayina ke yinaka bawu.

7 Mpe na Genèse kapu ya 22, nzila ya 15, beto ke tanga.

Mpe wanzio ya MFUMU bokilaka Abraham kuna na zulu na mbala ya zole,

Mpe tubaka, Munu me sila Na munu mosi, tubaka MFUMU, samu nge me sala diambu yayi, nge me ma- . . . nge me manga ve na kupesa mwana ya nge, mwana ya nge mosi kaka:

Ti mu ke sakumuna nge, mpe na kufulusaka mu ke fulusa nkuna ya nge mutindu bambwetete ya . . . mazulu, mpe mutindu zelo . . . na zulu ya kumu ya mubu; mpe nkuna ya nge ke baka mwelo ya mbeni ya yandi;

Mpe bayinsi nyonso ya ntoto ke sakumuka na nzila ya nkuna ya nge; samu nge me tumama na ndinga ya munu.

8 Ntangu yayi bika ti Mfumu kubwela masakumunu ya Yandi na lutangu ya Bandinga ya Yandi. Ntangu yayi mu ke zola kubaka, kana ba ke bokila yawu dilongi, yintu ya dilongi ya munu na suka yayi, ntete, kele, “Kumekama na ntwala ya bielo ya nsilulu.” Mpe yintu ya dilongi kele: *Kubaka Mielo Ya Mbeni*.

9 Nzambi vwandaka meka tata yango, samu ti Yandi pesaka yandi nsilulu. Mpe ntangu Nzambi ke sala nsilulu, Yandi ke zola kuvwanda ya kieleka ti muntu yayi kele ya kulunga samu na nsilulu, ntete Yandi kulungisa yina Yandi tubaka to yina Yandi silaka. Na yina ba silaka Abraham ti na nzila ya nkuna ya yandi yinza ya muvimba ke sakumuka, ti yandi ke kuzwa mwana. Mpe, na nzila ya mwana yayi, ke basisa Nkuna yina ke sakumuna ntoto ya muvimba. Mpe Abraham, ntangu ba pesaka yandi nsilulu, yandi vwandaka na bamvula makumi sambwadi na tanu; mpe Sarah, kento ya yandi, vwandaka na bamvula makumi sambanu na tanu. Kasi Biblia me tuba ti Abraham tulaka ve ntembe na nsilulu ya Nzambi, na nzila ya kukondwa lukwikilu, kasi vwandaka na kikesa, yandi vwandaka pesa lukumu na Nzambi. Mpe Nzambi, vwandaka meka yandi, ntangu nionso, kasi yandi lutaka na kumekama ya nsuka na ntwala lusakumunu kukwisa.

10 Mpe ya kele mutindu yina na Nkuna nionso ya Abraham. Nzambi ke pesaka beto kumekama yina ya nsuka na ntwala Yandi ke pesa nsilulu. Mpe kana ya zolaka salama, mu zolaka tuba kima mosi awa, samu na munu mosi, kasi mu ke sala yawu ve. Kumekama yina ya nsuka, samu na kutala wapi mutindu beno ke sala na yawu. Mpe ntangu Yandi pesaka kumekama yayi na Abraham, Yandi monaka Abraham kaka ya kukwikama mutindu yandi vwandaka ntangu yandi bandaka. Wapi lusakumunu ya ke vwanda na suka yayi kana beto yina ke kubaka nsilulu ya Yandi ya kubeluka ti beto ke bikala ya kukwikama mutindu beto vwandaka ntangu beto vwandaka awa mpe ndimaka yawu. Ata ti yina dokotolo me tuba, beto ke vwanda kaka ya kukwikama.

11 Mpe ntangu yandi salaka yayi, mpe yandi mangaka ata fioti ve na kupesa mwana ya yandi mosi kaka, kasi yandi belamaka na kusumika mbele na ntulu ya Isaac, samu na kubebisa kimbangi ya yandi. Yandi pesaka kimbangi, na bantu yina nionso zabaka yandi ti yandi ke kuzwa mwana yayi. Na yina ntangu mwana kwisaka, ba lombaka yandi na kuvutuka na manima, mpe na kubebisa kivuvu mosi kaka yina yandi vwandaka na yawu samu kimbangi ya yandi kulungisama. Mpe ntangu Nzambi monaka ti yandi vwandaka ya kukwikama na lukwikilu yina ya vwandaka na yawu na Nzambi, Nzambi talaka kuna na mazulu mpe Yandi tubaka, “Mu me zenga ndefi na Munu mosi ti Mu ke sakumuna nge mpe ke bidika nge, mpe nkuna ya nge ke baka kielo ya mbeni ya yandi.” Wapi mutindu ya nsilulu!

¹² Mpe Rebekah, yina zolaka vwanda mama ya mwana yayi, yina ba silaka, yina ba vwandaka vingila, ntangu ba bokilaka yandi na kumekama ya nsuka, na muntu mosi ya nzenza yina yandi me monaka ntete ve. Yandi monaka kaka kosalu ya Mpeve-Santu. Mpe ntangu bibuti ya yandi lendaka ve kubaka lukanu ti yandi ke kwenda na nzenza yayi to ve, samu na kuvwanda kento ya bakala yina yandi me monaka ata fioti ve, yandi kumaka na kumekama ya nsuka. “Beto ke bokila ntwenia ya kento mpe beto ke bika yandi kutuba. Beto ke kuwa yandi na yinwa ya yandi kana yandi ke kwenda, yinga to ve.”

¹³ Ya ke salama mutindu yina samu na Nkuna nionso ya Nzambi. Ya fwana basika na yinwa ya beno. Nzambi ke zola kuwa beno.

¹⁴ Na yina ntangu ba mekaka yandi, yandi vwandaka ve na keti-keti mwa ntangu fioti. Yandi tubaka, “Mu ke kwenda.” Mu ke zolaka yawu. Ya kele ve, “Bika mu baka lukanu. Bika mu longuka yawu.” Yandi vwandaka ya muvimba ya kundima. Ya kele bantu ya mutindu yina Nzambi lendaka sadila, ntangu beno kele ya muvimba ya kundima ti Nzambi ke zitisa nsilulu ya Yandi. Yandi tubaka, “Mu ke kwenda.”

¹⁵ Mpe bantu ya dibuta ya yandi na ntangu yina, vwandaka ya kupakulama mingi, ntangu yankaka ba zabaka yawu ve, kasi ba pesaka profesi ntangu ba tentikaka maboko ya bawu na zulu ya mpangi ya bawu ya kento, mpe mwana ya bawu ya kento; mwana-kento yayi ya ntwenia ya kitoko, ya Juif, ntangu ba vwandaka tula yandi na zulu ya kamela mpe vwandaka fidisa yandi na yinsi ya nzenza, na kati-kati ya bantu ya nzenza. Kasi ya vwandaka na Kima mosi samu na bawu. Ba tubaka, “Bika ti nkuna ya nge kubaka kielo ya mbeni ya bawu. Nge ke vwanda mama ya mafunda ya mafuku.”

¹⁶ Mpe, bubu yayi, dikanda yayi ya bantu mpe bantu yayi ya Nzambi me mwangana na mubu mosi na yankaka, na yinza ya muvimba. Na mvumbukulu yina ba ke vwanda mutindu bambwetete ya Mazulu, mutindu bansemo yayi ke semaka ke bakaka kisika ya bawu, ntangu ba ke luta na zulu. Mpe ntangu ba ke kwisa, ba ke vwanda mutindu bamubu na . . .to bazelo pene-pene ya mubu. Ya ke vwanda na mafunda ya mafuku ya bawu.

¹⁷ “Nkuna ya nge ke baka mwelo ya mbeni ya yandi.” Ya kele nsilulu ya Nzambi yina ba me pesa na ndefi, “Nkuna ya Abraham.”

Na yina, na Mpeve-Santu ya Yandi, na kumonaka ti mama yina vwandaka kinama ya mwana, diaka, samu ba kele kinama na nzutu. Na yina, Mpeve-Santu salaka na bantu yayi, tubaka, “Yandi . . .Bika ti Nkuna ya nge kubaka mwelo ya mbeni.” Na yina, Nzambi zengaka ndefi ti Yandi ke baka kielo ya mbeni, na yina wapi kisika ya ke tula Dibuundu ya Nzambi ya moyo?

18 Beto kele Nkuna ya Abraham. Na yina, beto, na kuvwandaka ya kufwa na kati na Klisto, beto kele, beto ke kuzwa Nkuna ya Abraham mpe beto kele bilandi ya yandi, na nsi ya nsilulu yina mosi ba pesaka na ndefi. Beto kele Nkuna ya Abraham, mpe beto kele bilandi ya konso nsilulu yina ba pesaka yandi. Kasi ntangu bakumekama ke kwisa, ya kele kisika beto ke kubwaka. Kasi mu ke kwikila ve ti Nkuna ya kieleka ya Abraham ke kubwa. Ba ke telama kaka na lukumu mpe ya kukwikama mutindu Abraham salaka.

19 Ntangu yayi beto ke mona ti Nzambi lenda ve kutuba kima mosi to—to kusala nsilulu yina Yandi ke lungisa ve. Yandi fwana kusala yawu samu na kuvwanda Nzambi. Bamvula na ntwala, ntangu bantu yayi, bantu ya nsilulu, nkuna ya Abraham vwandaka na nzietolo, ba vwandaka kwenda na yinsi ya nsilulu, ya vwandaka na mwelo mosi, yina telamaka na ntwala ya yandi, mpe ya vwandaka mpangi ya yandi mosi, Moab, yina tubaka, “Beno ke zabuka ve na ntoto ya munu. Mu ke tala diambu yayi mbote ti nge ke zabuka ve na ntoto ya munu.”

20 Yandi tubaka, “Kana bangombe ya beto kudia matiti ya nge to kana bawu kunwa masa ya nge, beto ke futa nge samu na yawu.”

Kasi yandi tubaka, “Nge ke zabuka ve yinsi yayi.”

21 Kasi nsilulu ya Nzambi vwandaka ya kieleka. Na yina ba kwendaka bokila profete ya bawu, Balaam, mpe ba nataka yandi kuna samu na kusinga bantu yayi. Mpe tala yina yandi tubaka. Ba mekaka na kutalisa yandi lweka ya kulutila yimbi ya nkuna ya lusakumunu, kasi Nzambi talisaka yandi kitini ya yawu ya kulutula kitoko. Yandi tubaka, “Yandi yina ke singa Israel, yandi ke singama, mpe yandi yina ke sakumuna yandi, yandi ke sakumuka.” Mpe ba katulaka bibaka mpe Israel zabukaka bandimba. Nzambi silaka ti yandi ke baka mwelo ya mbeni ya yandi.

22 Bamvula mingi, na ntwala, mosi kwisaka kuna na nkumbu ya Daniel, yina vwandaka na ndonga ya Nkuna yayi ya Kimfumu, mpe na ndonga ya bansilulu, samu ti yandi vwandaka Nkuna ya Abraham. Mpe Nzambi soolaka yandi na ntwala yinza kusalama, samu na kuvwanda profete ya Yandi, mpe yandi zingaka na lukumu mpe yandi vwandaka ya kukwikama. Mpe ata ti na yinsi ya nzenza, yandi bakaka lukanu na kati ya ntima ya yandi, “Mu ke vwanda ya kuvedila ve na bawu.” Yina kele Nkuna ya kieleka ya Abraham; yandi vwandaka zinga na yinsi yina kele mutindu yankaka, vwandaka zinga na kati ya bantu ya mutindu yankaka, kasi yandi vwandaka kaka na lunungu na nsilulu yina. “Mu ke vwanda ya kuvedila ve na bawu. Mu ke vwanda ya kukwikama.”

23 Nzambi tulaka yandi na kumekama mutindu Yandi salaka na tata ya yandi, Abraham. Mpe ntinu tubaka, “Nge ke vwanda

mosi ya beto mpe nge ke sambila mutindu beto ke sambila, to mu ke losa nge na kati ya dibulu ya kufuluka na bankosi yina kele na nzala.”

²⁴ Daniel, mutindu Abraham tata ya yandi, yandi tubaka, “Nge lenda losa munu na kati ya dibulu ya bankosi, kasi mu ke fukimina ata fioti ve biteki ya nge. Mu ke baka ve nsambulu ya nge ya misiku. Mu ke bikala ya kukwikama na Yehowa.”

²⁵ Mpe kuna kwisaka kumekama ya ngolo. Ntinu zitisaka nsilulu ya yandi mpe yandi bakaka profete, to yandi bakaka yandi mpe yandi losaka yandi na dibulu ya bankosi. Mpe ntangu bankosi, mbeni ya Daniel, lemukaka na profete, Nzambi zitisala nsilulu ya Yandi. Yandi bakaka mwelo ya mbeni ya yandi. Nzambi tulaka Wanzio mosi kuna na ntwala ya bankosi yina, mpe yandi bakaka mwelo. Nzambi ke zitisaka nsilulu ya Yandi. “Yandi ke baka mwelo ya mbeni ya yandi.” Nzambi me tuba mutindu yina.

²⁶ Na manima ya vwandaka diaka na tatu yina zengaka ndefi na bawu mosi ti ba ke vwanda ya kukwikama na diambu yango, yina vwandaka Nkuna ya Abraham ya kieleka, mpe ya vwandaka Schadrac na Méschac mpe Abed-Nego, mpe ba lutaka na kumekama. Mpe bawu tubaka, “Kana beno kufukama ve na muningu ya harpe mpe na muningu ya mpungi, kana beno fukama ve na nsambulu ya beto, mpe beno kutula ve na lweka bima yina beno ke—ke simbisaka! Mpe beno kele na kifu, na mutindu nionso. Nsambulu ya beno me luta ve nsambulu ya bantu yankaka.” Beto ke kuwaka yawu ve ntangu nionso? Kasi nsambulu ya Yesu Klisto kele mutindu yankaka. Ngolo ya mvumbukulu ya Yandi mutindu yankaka. Beto kele bantu ya mutindu yankaka, bantu ya kuswaswana, kinganga-Nzambi ya kimfumu. Nzambi ke salaka luswaswanu.

²⁷ Kasi ntangu ba tubaka, “Beno fwana kukuma mosi ya beto.” Ya zolaka vwanda mbote mingi samu na Schadrac na Méschac mpe Abed-Nego kana ba zolaka kukuma mosi ya bawu, kasi ba zolaka kukuma ata fioti ve mosi ya banzenza yina. Ntangu yayi, kana ba tubaka, “Kana beno kusala yawu ve, beto kele awa na kielo yina ke nata kuna na dibulu ya tiya, ti beto lendaka kuzibula yawu mpe kulosa beno kuna na kati, mpe beno ke vwanda na kiadi samu beno me kuma ve mosi ya beto.”

²⁸ Ba bambukaka moyo na nsilulu. Ba nataka bawu kuna na dibulu ya tiya. Mpe ntangu ba zibulaka kielo mpe losaka bawu kuna na kati ya tiya, mbeni ya bawu yina zolaka kuyoka bawu na tiya, ba bakaka mielo ya mbeni ya bawu. Nzambi fidisaka Mwana ya Yandi na kati ya tiya yina mpe tulaka madidi na makala yina, mpe solulaka na bawu ntangu ba vwandaka kuna na kati. Nsilulu ya Nzambi vwandaka ya kieleka. Ba bakaka mwelo ya mbeni. Ba me mekaka bawu ntete, na manima ba bakaka mwelo ya mbeni.

Ya vwandaka ve Yesu Yina salaka nsilulu? “Kana beno niongisa mosi ya bana yayi ya fioti, ya ke vwanda mbote mingi ti beno kanga beno kisengo na nkingu mpe ba losa beno na yisi ya mubu. Beno meka ve kuniongisa bana yayi ya fioti ke kwikilaka na Munu. Mpe bidimbu yayi ke landa bayina ke kwikila na Munu.”

²⁹ Yandi salaka luswaswanu. Yandi talisaka nani vwandaka kwikila mpe nani vwandaka kwikila ve.

Na yina, ntangu nionso, ya kele na bankonga tatu ya bantu, ya kele: muntu ya kukondwa lukwikilu, mukwikidi ya kati-kati, mpe mukwikidi. Kasi Nzambi kele na mutindu ya kutralisa nani kele mukwikidi. Mukwikidi yina ke telama ngwi na yina Nzambi me tuba ti ya kele Kieleka. Yinga.

³⁰ Ya vwandaka Elie, ya bwala Tishebe, ntangu ya kumaka ntangu ya kutralisa ngolo, yandi banzaka ti yandi vwandaka kaka yandi mosi na kati ya yinsi yina vwandaka zinga samu na Nzambi. Mpe ntinu zolaka kulutisa yandi na kumekama. Mpe ba talisaka yandi mpasi. Mpe mwa ntinu yina ya kento, yina vwandaka pakula na kizizi ya yandi, na nkumbu ya Jézabel, zolaka kufwa yandi. Mpe ntangu ya kumaka na ntangu ya kumekama ya ngolo, Elie bakaka mielo ya mbeni ya yandi mpe vutulaka diaka yinsi ya muvimba na Nzambi. Nzambi ke zitisaka nsilulu ya Yandi.

³¹ Ya vwandaka Moise, yina vwandaka diaka na ndonga yayi ya Nkuna ya kimfumu, Nkuna ya Abraham, ti ntangu ba fidisaka yandi kuna na Egypte, samu na kuvulusa bana ya Israel; mpe Nzambi pesaka yandi bidimbu mpe mambu ya ngitukulu ya kusala, mpe samu na kubula ntoto, mpe samu na kubasisa makototo, mpe banzinzi, mpe mudidi, mpe matadi ya mvula, mpe mvula, mpe tiya, mpe yandi salaka bimangu yayi nionso. Na yina, ntangu yandi basisaka bawu na diboko ya Yehowa, ya vwandaka na ntangu yina yandi kutanaka na mwelo kati-kati ya yandi mpe yinsi ya nsilulu. Ya vwandaka na Mubu ya Mbwaki, kibaka na nzila. Ba ziungaka bawu na makesa ya Pharaon, miongo, ntoto ya kuyuma, mpe Mubu ya Mbwaki. Kasi Moise kwendaka na ntwala mpe bakaka mwelo ya mbeni ya yandi, mpe zabukaka Mubu ya Mbwaki, ya kuyuma, na yina yandi tambulaka na nzila ya kuyuma. “Yandi ke baka mwelo ya mbeni.” Nzambi tubaka yawu, mpe yina sukisaka diambu.

³² Mwa bamvula fioti na ntwala ntangu bakumekama kwisaka, mpe dibuundu nionso kuninganaka, mutindu ya kele mpasi ve samu na dibuundu ya bantu na kusala ntangu kima mosi ke tambula ve mutindu ya lendaka vwanda. Nzambi ke sala ti ya vwanda mutindu yina. Nzambi ke nata mambu na kati ya dibuundu, “Mwana nionso kwisa na Nzambi ba ke meka yandi, ba ke yunsa yandi, ba ke tesa yandi.” Yandi ke bika bimbevo kubula beno. Yandi ke bika bimbevo kukwisa na zulu ya beno,

samu na kutesa beno mpe kuyunsa beno, samu na kutalisa na yinza ti beno kele Nkuna ya kieleka ya Abraham. Yandi ke bika yawu na luzolo ya Yandi Mosi. Yandi ke bika bampasi. Yandi ke bika bankundi kuyambula beno. Yandi ke pesa muswa na bima yayi nionso, mpe yandi ke bika diabulu kulanda beno samu na kumeka beno. Mpe yandi ke sala nionso kasi yandi ke baka ve luzingu ya beno. Yandi lendaka kulosa beno na zulu ya mbeto ya bampasi. Yandi lendaka kusala ti bankalani ya beno kuyekula beno. Yandi lendaka sala ti dibuundu kutelemina beno. Yandi lendaka sala konso kima yina, mpe ya kele luzolo ya Nzambi ti yandi sala yawu. Ba me longa beto ti ya kele kitoko mingi kulutila wolo, samu na beto.

³³ Yinki samu na Abraham na Isaac, na zulu ya mongo, muntu yina ba pesaka nsilulu? Mpe na kukwikama ya yandi mpe luzabu ya yandi, mpe lukwikilu ya yandi na Yehowa, ya kele samu na yawu, mpe samu na yawu kaka, ti Nzambi talaka na yisi mpe tubaka, “Nkuna ya yandi ke baka mielo. Mu me zenga ndefi na Munu mosi ti Mu ke sala bima yayi.” Ya vwandaka ve ya kulutila nene na nzila ya yawu Yandi lendaka kuzenga ndefi, kasi Yandi zengaka ndefi na Yandi mosi.

Na yina, kana Yandi bikaka Abraham kuluta na kumekama yina ya nsuka, Yandi fwana kulutisa beno mpe munu na kumekama yina ntangu ya nsuka, ntangu yina ya lukanu ntangu bima nionso me kuma ntama ya beno. Beno fwana telama beno mosi kuna. Alleluia! Yawu yina.

³⁴ Beno telama beno mosi. Beno kwenda kuna mpe beno tuba, “Ata ti Yandi kufwa munu, kasi mu ke tula kivuvu na Yandi.” Yina kele Nkuna ya Abraham. Ya kele Yandi yina ke pesaka nsilulu. “Mu ke kipe ve yina bantu yankaka ke tuba, yina bantu yankaka ke sala; samu na munu mpe yinzo ya munu, beto ke sadila Nzambi.” Ba ke tuba, “Kana bantu yankaka ke tuba, ‘Ya kele na kima mosi ve na zingulu ya bawu. Ya kele nkonga ya bantu yina ke kukizangula’; samu na munu mpe yinzo ya munu, beto ke sadila Nzambi.”

Mpe mu ke zola kutuba awa, yina Paul tubaka, “Mu ke sadilaka Nzambi ya batata ya beto na nzila yina ba ke bokilaka ‘binzambi-nzambi.”

“Ata ti bandinga ya yimbi me kota na dibuundu, ata ti bantu ke balula mambu, mpe ata ti bapofete ya luvunu ya mutindu na mutindu mpe bima ya mutindu na mutindu me kota na dibuundu na kati ya bantu, mpe na bankalani mpe bima nionso; kasi samu na munu mpe yinzo ya munu, beto ke sadila Mfumu. Ata ti bawu nionso kumanga na kukwisa, ata ti dibuundu me kuma madidi, ke kipe diambu mosi ve; munu mpe yinzo ya munu, beto ke sadila Mfumu. Ata ti ba me sambila samu na muntu mosi mpe yandi me beluka ve; yina ke sala kima mosi ve; samu na munu mpe yinzo ya munu, beto ke sadila Mfumu.” Bakutesa mpe bakumekama.

³⁵ Bantu ke kubwaka, kasi Nzambi ke kubwaka ve. Muntu, beno ke tula kivuvu ya beno na muntu, yandi ke sala kifu. Ntangu yankaka na luzolo ve, kasi yandi ke sala yawu. Nzambi ke bika ti yandi kusala yawu samu Yandi katula lukwikilu ya beno na muntu. Lukwikilu ya beto kele ve na ndwenga ya muntu, kasi na ngolo ya mvumbukulu ya Yesu Klisto. Ya kele kisika yina Nkuna ya kieleka ya Abraham ke vwandisa nsilulu ya yandi. Samu, ba lendaka kaka kuvwanda Nkuna ya Abraham ntangu ba me kuzwa Mpeve-Santu. Kukondwa Mpeve-Santu ba kele ve Nkuna ya Abraham. Lukwikilu mosi yina vwandaka na Abraham me kwisa na mukwikidi. Ata ti yina ke salama to yina ke telemina, mukwikidi ke kwenda kaka na ntwala.

³⁶ Balangididi vutukaka mpe tubaka, “Oh, ya kele—ya kele bulawu na kumeka. Ya ke na mfunu ve ya kukwenda ntama mingi, samu bantu yina kele bantu ya nene kuna. Mpe bawu kele na baluyalu ya nene, mpe bawu—bawu kele na madinga, mpe, na yina, beto ke monana mutindu bampasu na lweka ya bawu.”

³⁷ Mu zaba ve, kasi mu me ndima na kukwikila awa ti Josué vwandaka kaka mwa muntu ya fioti, kaka mwa muntu mosi, ya nkufi. Mu lenda mona yandi kulemuka, na zulu—na zulu ya mwa sanduku mosi, mpe tubaka, “Babakala mpe bampangi,” na mafuku zole ya bantu, “beto kele na kiyeka ya kulutula samu na kununga bawu.” Beno me mona? Samu na yinki? Yina vwandaka Nkuna ya Abraham. Nzambi pesaka nsilulu. Yina vwandaka kima ya bawu. Nzambi pesaka nsilulu. Ata ti kutelemina vwandaka, Nkuna ya kieleka ya Abraham tubaka, “Beto lenda kubaka yawu samu Nzambi me pesa yawu na beto.”

³⁸ Tala kisika ya beno na suka yayi. Tala kisika ya Dibuundu ya Nzambi ya moyo. Mu ke kipe ve yina muntu yankaka ke tuba, yina dokotolo ke tuba, konso kima yina, yina muntu ya kukondwa lukwikilu ke tuba, Beto kele na kiyeka ya kulutula na kutelama na ntwala ya konso kima yina ke kwisa. Beto kele Nkuna ya Abraham, mpe beto ke baka mwelo ya mbeni ya beto, ata ti yina mbeni kele. Nzambi pesaka nsilulu. Ya vwandaka ya bawu, kima ya bawu.

³⁹ Kubeluka kele kima ya beno. Mpulusu kele kima ya beno. Mpeve-Santu kele kima ya beno. Mpe ya kele na mingi, mafunda ya milongi mpe nionso yina na yinsi bubu yayi, yina ke tuba, “Ya kele ve ya kieleka.” Kasi Nkuna ya Abraham me zaba ti ya kele mutindu yina. Ba ke luta mbala mosi na bitumba mpe ba ke baka mielo ya mbeni. Nzambi tubaka ti ba ke sala yawu. Ba ke kwikila yawu samu ya kele nsilulu. “Nkuna ya yandi ke baka mwelo ya mbeni.” Ntangu yayi beno ke luta na bakutesa, bakumekama.

⁴⁰ Mpe Josué telamaka kuna, ya kukwikama. Mwa muntu yayi ya fioti tubaka, “Mu ke kipe ve wapi mutindu ba kele nene. Mu ke kipe ve mutindu ya dionga ba kele na yawu, wapi mutindu bambanza ya bawu me tungama na bibaka ya yinda, mpe wapi

mutindu ya kele nene. Nsilulu ya beto kele, ti, ‘Nkuna ya bana ya Nzambi ke kubaka mwelo,’ mpe beto ke kwenda kuna samu na kununga bawu. Beto kele na kiyeka ya kulutila samu na kunwana na bawu.” Oh, tala Nkuna ya kieleka.

⁴¹ Mingi na kati ya bawu yina butukaka, na nkuna ya kimuntu, tubaka, “Beto lenda ve kusala yawu. Ya kele ve na mfunu ya kumeka. Beno me mona, beto kele fioti. Beto kele bantu ya nsi; nionso yina.” Ata ti, yandi zolaka ve. . . Ba vwandaka tala. . . yina disu monaka. Mpe Josué vwandaka tala yina Nzambi me tuba.

⁴² Nkuna ya Abraham ke talaka ve bima yayi ya kimuntu. Ba ke talaka na yina Mfumu me tuba. Beno tala nsilulu. Yinki kana Abraham zolaka kutala na yina ya kimuntu? Na kento yina vwandaka na bamvula nkama mosi. . . Yandi vwandaka na bamvula, makumi yivwa. Mpe yandi vwandaka na bamvula nkama mosi. Mpe yandi zingaka na yandi kubanda yandi vwandaka mwana-kento ya ntwenia, mpe mwana-bakala ya ntwenia, mpe ata nkuna ve. Yandi talaka na bima yina ve. Yandi tubaka ti yandi talaka bima yina mutindu ya vwandaka ve, samu yandi talaka kaka na yina Nzambi tubaka. “Mu ke sakumuna nge, Abraham, mpe mu ke pesa nge bana na nzila ya Sara.” Mpe yandi kwikilaka yawu. Beno ke tala ve na kutelemina. Beto ke tala yina Nzambi me tuba. Nzambi tubaka yawu, yina me sukisa diambu.

⁴³ Na yina ntangu yandi kumaka na Jourdain, ntangu Josué kumaka mfumu ya mbuta ya makesa, mpe ntangu ba kumaka kuna na lweka ya masa mpe ba lendaka kutala na simu yina mpe kumona Jéricho. Kasi, na kati-kati ya yawu, ntangu Josué kukubikaka makesa ya yandi, ya vwandaka na mwelo. Ba bokilaka mwelo yina Jourdain.

Kasi nsilulu ya Nzambi kele mbote na mwelo nionso. Ya vwanda konso mwelo yina, nsilulu ya Nzambi kele mbote. “Yandi ke baka mielo ya mbeni ya yandi.” Yina ke sukisa diambu.

Ntangu yandi kumaka na Jourdain na suka yina, ya lendaka vwanda, mu ke kwikila ti diabulu salaka ti mazulu kuvwanda ya kufuluka na matuti ya mvula bisika nionso, ti masa mingi ya poto-poto kuvwanda kuna, bilanga kubeba na kufuluka ya masa. Oh, wapi ntangu ya kumekama! Kasi Josué tubaka, “Beno kubama, beno ke mona Nkembo ya Nzambi.” Mpe ba kukisantisaka mpe bawu kubamaka, ba kubamaka na ntangu mambu nionso vwandaka ya kuswaswana. Kasi yina vwandaka Nkuna ya Abraham, yina Nzambi zengaka ndefi, “Mu ke pesa yandi mwelo.” Yandi kwisaka na Jourdain, yina vwandaka mwelo ya yandi, mpe yandi bakaka yawu.

⁴⁴ Mosi ya basuka yayi mu ke kuma mpe na mwelo yina ya nsuka. Beno fwana kukuma na Jourdain, kasi Nkuna ya

Abraham ke baka mwelo. Ata ti yina yawu kele, yandi ke baka mwelo ya mbeni nionso.

⁴⁵ Bantu yina nionso vwandaka bantu ya nene. Bawu kufwaka na kati ya kisalu ya bawu. Kasi, na nsuka, kilumbu mosi na Bethléhem na Judée, Nkuna ya Kimfumu butukaka. Na yina, nionso yankaka vwandaka kaka bivudi. Nkuna ya Kimfumu butukaka, na muntu ve. Kasi Yandi butukaka na mwense, na Ngolo na kati ya misisa ya Yandi, samu na kununga lufwa mpe difelo. Nzambi salaka nsilulu. Muntu ya nsuni lendaka ve kusala yawu. Kasi kana Nzambi me sala nsilulu, Yandi kele kaka Nzambi mosi yina Yandi vwandaka mwa minuti fioti na ntwala, na Abraham, Yehowa-yilé, Mfumu ke pesa nzila samu na kubaka mwelo. Wapi mutindu beto ke sala yawu? Josué kufwaka. Moise kufwaka. Bayankaka nionso kufwaka. Kasi Nzambi tubaka, “Yandi ke baka mwelo ya mbeni ya yandi.” Wapi mutindu yandi ke baka lufwa? Ya kele na mutindu ya kusala mambu. “Yandi ke baka mwelo ya mbeni ya yandi.”

⁴⁶ Nkuna ya Kimfumu butukaka. Yandi mekamaka na mutindu nionso mutindu beto kele. Kaka mutindu beno fwana kumekama, mutindu mosi Yandi mekamaka. Diabulu na nswalu nionso nataka Yandi, ntangu Yandi kuzwaka Mpeve-Santu, na kati ya ntoto ya kuyuma bilumbu makumi yiya mpe bampimpa makumi yiya, samu na kumekama. Mpe ntangu Yandi basikaka. . . Mpe na lufwa ya Yandi, ba bulaka bansoso na maboko ya Yandi, mpe losilaka Yandi mate na kizizi. Yandi lutaka na kati ya bimbevo nionso. Kasi ntangu Yandi vwandaka awa na zulu ya ntoto, Yandi talisaka ti Yandi lendaka kununga kimbevo. Ntangu mama ya kento ya Pierre vwandaka ya kubela, na paralysie, yandi simbaka yandi na diboko mpe fièvre bikaka yandi. Ntangu muntu ya kimbevo ya wazi bokaka na mwelo, “Mvindu! Mvindu! Kana Nge me zola, Nge lenda belula munu.”

⁴⁷ Yandi tubaka, “Mu me zola yawu. Beluka.” Yandi nungaka mpe bakaka mwelo ya kimbevo ya wazi. Yandi bakaka mwelo ya ba-fièvre.

Yandi salaka ti yinza ya muvimba kutumama na Yandi. Yandi vwandaka Nkuna ya Abraham, Nkuna ya Kimfumu, Yina ba pesaka nsilulu; na Yandi, Abraham mpe Nkuna nionso yina landaka yandi, tii na Nkuna ya Kimfumu, mpe Nkuna nionso na manima ya Yandi. Nsilulu ya Nzambi kele ya kieleka. Yandi nungaka kimbevo.

Yandi nungaka mpukumunu. Ntangu mbeni losilaka Yandi mate na kizizi, yandi bulaka Yandi na ditama, Yandi pesaka yina yankaka. Ntangu ba vusaka mandefo ya Yandi mpe losilaka Yandi mate, Yandi vutulaka ata fioti ve na mafingu. Yandi nungaka mwelo ya mpukumunu mpe bakaka yawu.

48 Na yina beno ke tuba, “Nkadulu ya munu ya nganzi ke bika munu ve kusala yawu.” Beno, Nkuna ya Abraham, yinga, tata, Yandi nungaka yawu samu na beno.

49 Ntangu ba fingaka Yandi, Yandi vutulaka ve na mafingu. Ntangu ba vwezaka Yandi, Yandi kangaka yinwa ya Yandi. Ntangu ba bokilaka Yandi diabulu, Yandi kangaka yinwa ya Yandi. Yandi vwandaka na kisalu mosi ya kusala, mpe ya kele bisalu ya Tata, mpe yawu yina Yandi vwandaka sala. Na yina, na nsuka, ba nataka Yandi na kulunsi. Yandi zolaka kukutana na lufwa. Bayankaka nionso nungaka bamubu, mpe ba nungaka yinza, mpe ba nungaka bankosi, mpe ba nungaka tiya. Ba nungaka bima nionso kasi lufwa ve. Kasi awa vwandaka Muntu yina bakaka yawu na kati ya mabanza ya Yandi, na misisa ya Yandi, mpe kuna vwandaka Ngolo ya lunungu ya lufwa. Na yina ba bakaka maboko ya Yandi mpe tandaka nzutu ya Yandi mpe komaka Yandi na kulunsi. Ba bulaka Yandi mpe ba lwadisaka Yandi ti mikwa ya Yandi vwandaka kutala Yandi. Kasi ntangu ba salaka yawu, mpe ba salaka nionso yina ba lendaka sala, lufwa bulaka Yandi, na kutubaka, “Ntangu yayi mu ke baka Nge mutindu mu salaka na Josué. Mu ke baka Nge mutindu mu salaka na Daniel. Mpe mu ke sala nionso yayi, samu na kusala ti Nge kufwa.”

50 Mpe Yandi kufwaka tii mwini kumaka na nsoni ya yawu mosi. Yandi kufwaka tii yinza kumaka na nsoni mpe yawu mangaka na kusala. Mwini dindaka na kati-kati ya kilumbu. Bambwetete lendaka ve kubasika. Yandi kufwaka tii bima nionso kumaka ndombe mingi ti beno lendaka ve kumona diboko ya beno na ntuala ya beno, na kati-kati ya kilumbu. Mu ke banza yinza tubaka, “Bika mu kufwa kintwadi na Yandi.”

51 Mpangi! Na yina diabulu fidisaka moyo ya Yandi ya ntalu na mabulu ya nene ya difelo. Kuna mielo zibukaka, kasi Yandi basikaka kuna na kilumbu ya tatu, Yandi nungaka yawu. Amen. “Nkuna ya Yandi ke baka mwelo ya mbeni.” Yandi nungaka lufwa! Yandi nungaka difelo. Na suka ya ntete ya Paki, Yandi nungaka ntoni. Ntangu yayi beto kele, kulutila minungi, na Yandi Yina zolaka beto.

52 Na Kilumbu ya Pentecote Yandi fidisaka Mpeve-Santu, samu na kulandila, na kati ya Bantu ya makanda, samu na kubasisa Nkuna ya nsilulu. Samu na kupesa na Bantu ya makanda, bayina ba losaka, samu na kupesa bawu mbotika ya Mpeve-Santu, samu na kukotisa bawu na Nsilulu. Ntangu yayi beto kele na muswa ya kununga kimbevo nionso. Beto fwana ve kununga yawu; ba me nungaka yawu dezia. Beto fwana kaka kulomba nsilulu mpe beto kubaka yawu. Ba me nungaka yawu dezia. Ba me nungaka lufwa. Ba me nungaka difelo. Ba me nungaka kimbevo. Ba me nungaka mpukumunu. Ba me nungaka bampeve nionso ya yimbi. Ba me nungaka difelo. Ba me nungaka lufwa. Ba me nungaka ntoni. Beto me telama na mwelo, mpe

beto ke baka yawu, beto fwana ve kubula disasi mosi. Ba me futa dezia samu na yawu.

⁵³ Mbeni ya yandi, Yandi ke baka mwelo ya mbeni ya yandi. Bantu yikwa? Mafunda ya mafuku. Yandi ke baka mwelo ya mbeni ya yandi, mbeni nionso. Yandi vumbukaka na lufwa. Beto ke baka yawu samu Yandi pesaka yawu na beto. Nionso yina kele kaka dikabu ya mpamba, na nganda ya nionso yina, mpe bima nionso yina Yandi salaka, mpe yandi nungaka mielo nionso. Yandi nungaka kimbevo, Yandi bakaka mwelo. Kima mosi kaka beto fwana sala kele kukwenda na mwelo, na kutubaka, “Na Nkumbu ya Yesu Klisto, Munungi!” Amen.

⁵⁴ Ntangu ya kumaka ntangu ya kufwa, mpe ti lufwa kutuba, “Beno tala munu kusala yandi kumanga nsambulu ya yandi.”

⁵⁵ “Na Nkumbu ya Yesu Klisto ya Nazareth, vutuka na manima, Jourdain!” Nkuna ya Abraham ke baka mwelo.

⁵⁶ Na yina, Paul tubaka, ntangu ba vwandaka kukubama samu na kuzenga yintu ya yandi, Nkuna ya Abraham, yandi tubaka, “Lufwa, wapi kisika kele ntunga ya nge? Ntoni, wapi kisika kele lunungu ya nge? Matondo na Nzambi Yina pesaka beto lunungu na nzila ya Yesu Klisto.”

⁵⁷ Yandi ke baka mwelo ya mbeni ya yandi, yandi ke baka yawu. Ntangu yayi, ba ke bula yandi ve na mwelo. Yandi ke nunga yawu mpe ke baka yawu. Yandi ke baka yawu. Yandi ke na Ngolo ya kusala yawu.

⁵⁸ Na kati ya Dibuundu ya Nzambi ya moyo, na suka yayi, ya kele na Ngolo samu na kubelula bimbevo nionso. Na kati ya Dibuundu ya Nzambi ya moyo kele na Ngolo ya kununga bampukumunu nionso. Na maboko ya Dibuundu ya Nzambi ya moyo, na suka yayi, kele na Ngolo samu na kukanga disumu mpe kulosa yawu ntama, mpe kuzwa mbotika ya Mpeve-Santu, na kati ya Dibuundu ya Yesu Klisto.

“Nionso yina beno ke zola, beno lomba yawu na Nkumbu ya Munu, mpe beno ke kuzwa yawu. Na mwa ntangu fioti, mpe yinza (yina kele ve Nkuna, nkuna yina ke sobaka ve) ke mona Munu diaka ve. Kasi beno ke mona Munu, samu Mu ke vwanza na beno, ata mpe na kati ya beno, tii na nsuka ya yinza.” Yinki? Nkuna ya Kimfumu. “Bisalu yina Mu ke sala, beno mpe ke sala yawu. Mu ke siamisa Munu mosi ti Mu kele na beno, na yina bidimbu yayi ke landa bayina ke kwikila.”

Yandi ke baka nkuna ya mbeni ya yandi. Yandi ke kubaka. Nkuna ya Yandi ke baka mwelo ya mbeni ya yandi, ata ti yinki mwelo ya kele. Kana ya kele kimbevo, bampukumunu, disumu, konso mwelo yina ya kele, ba me nungaka yawu. Mpe Nkuna ya Abraham ke baka yawu.

⁵⁹ Beno kele na kiese ve, na suka yayi, na kuzaba ti beto me telama ntangu yayi kulutula munungi, kulutula munungi? Oh,

ya kele ve ya kunwana. Bitumba me manisa. Ba me bula siflet. Ba me telemisa dalapo. Mpe na kati-kati ya konso kinkuti ya disumu, na kati-kati ya konso kivinga ya bambevo, kele na kulunsi ya ntama ya lunungu, ba me kuna na Menga ya Yesu Klisto, Munungi. Kima mosi kaka beto ke sala kele kukwikila, kutala mpe kuzinga.

“Mu ke vwanda na beno. Mu ke siamisa yawu. Bantu ke kwisa na bilumbu ya nsuka, mpe ba ke tuba, ‘Oh, mbote, kima yayi *vwandaka*.’ Kasi Mu ke vwanda na beno. Mpe bima yayi Mu me sala, awa na zulu ya ntoto, Mu ke vwanda na kati ya beno, samu na kusala bima mosi yayi. Na yina ba ke zaba. Ba ke mona Munu. Bantu ya munu ke mona Munu. Nkuna ya Abraham ke mona Munu. Ba ke zaba Munu. Ba ke ndima Munu. Bantu yankaka ke bokila Munu, ‘Béelzébul,’ kaka mutindu bawu salaka. Kasi beno ke zaba Munu, samu Mu ke vwanda na beno. Beno ke mona Munu, beno ke mona na meso ya beno. Beno ke mona Munu, samu Mu ke vwanda na beno, tii na nsuka ya yinza, bima yayi Mu ke sala. Yandi yina ke kwikila na Munu, bisalu yayi Mu ke sala yandi mpe ke sala yawu, bisalu ya mutindu mosi.”

⁶⁰ Mpe, bubu yayi, Dibuundu ya Nzambi ya moyo kele na bweso ya kutelama kuna mpe kumona Yesu Klisto, Mwana ya Nzambi ya moyo, yina me vumbuka na lufwa, me telama awa, ke zinga na kati ya Dibuundu ya Yandi, samu na kusala bima yina Yandi salaka na ntangu yina. Na yina beto ke baka mwelo ya konso mbeni.

⁶¹ Kana beno kele na mbeni na suka yayi, na yina, mpangi ya munu ya bakala, ya kele kaka . . . Kana beno kele Nkuna ya Abraham, na manima ya kuwa yayi, ya kele ve na mingi ya bampeve ya yimbi na difelo yina lenda telemisa mwelo yina na ntwala ya beno. Ya ke zibuka. Mu ke tala ve yina yawu kele. Beno ke kwenda kuna, mutindu Nkuna ya nsilulu, beno ke tuba, “Mu ke lomba yayi samu na munu. Yayi kele ya munu, samu Nzambi zengaka ndefi ti Yandi ke vumbula Yesu na lufwa, mpe, na nzila ya Yesu, mu ke nunga yawu. Mu ke kwisa na Nkumbu ya Munungi yango, Yesu Klisto. Vutuka na manima. Mu ke luta.” Amen. “Yandi ke baka mwelo ya mbeni.” Na yina beno telama kuna, na mapeka ya kusungama mbote-mbote mpe kinwaninu ya beno ya kisengo ke sema, ya kufikama na Menga ya Mfumu Yesu. Mbeni ke zaba yawu.

⁶² Kana beno kele na nsatu, beno tuba na Yandi ntangu yayi na yina beto ke sambila, beno yina kele awa, na suka yayi, na yina beno ke kulumusa bayintu ya beno. Mpe kana beno kele na nsatu, beno ke telemisa kaka diboko ya beno na Yesu? Mpe beno tuba yawu kaka na kati ya ntima ya beno, na kati ya ntima ya beno, mpe beno tuba, “Mfumu, Nge zaba nsatu ya munu. Ntangu yayi, mu me kuwa, na suka yayi, mpe ya kele Biblia, ‘Yandi ke baka mwelo ya mbeni.’ Mu ke kwisa samu na kubaka mwelo. Ya lendaka vwanda ti mu kele na nkandulu ya nganzi. Ya lendaka

vwanda ti mu ke na nsatu ya Mpeve-Santu. Disumu me kanga munu. Mu ke na nsatu. Kasi mu ke kwenda na mwelo ntangu yayi. Mu ke kwenda kubaka yawu, na suka yayi, mwelo ya munu. Na yina, katuka na nzila, mu ke luta.”

⁶³ Mfumu ya lusakumunu, Nge me mona maboko yayi nionso. Mpe Nge zaba ti yayi kele Ndinga ya Nge, Mfumu. Mu me zonza Yawu kaka, mpe mu me talisa na nzila ya Masonuku. Bantu na kati ya Biblia, wapi mutindu ba nungaka bimfumu mpe salaka mambote, mpe bawu kufwaka tiya, ngolo ya tiya, mpe tinaka meno ya mbele, mpe kangaka bayinwa ya bankosi, mpe, oh, wapi mutindu, bakento ya bawu ya bambuta kuyambaka bamvumbi ya bawu na mvumbukulu, mpe bima mingi, samu Nge silaka yawu. Ya kele nsilulu ya Nge, “Nkuna ya Yandi.” “Nkuna ya Nge, Abraham, ke baka mwelo ya mbeni.” Mpe Nge ke zitisa nsilulu ya Nge.

⁶⁴ Ntangu yayi pesa bawu, Mfumu, nsatu ya ntima ya bawu. Bika ti bawu katuka awa bantu ya kusoba. Bika ti bawu kwenda, na kuzabaka ti bawu kele—bawu kele minungi, samu ti Nkuna ya Kimfumu nungaka samu na bawu. Ntinu ya Kimfumu, ntangu Yandi kwisaka, butukaka na mwense, Yandi nungaka mbeni nionso, ata mpe lufwa. Na yina lufwa yawu mosi lenda ve kupesa boma na Nkuna ya Abraham. Beto kele na nsilulu ti beto ke baka difwa ya ntoto, beto ke vutuka diaka na mutindu ya kulutula nkembo, na nzutu ya nkembo, ntangu ba ke tula mbeni ya nsuka na nsi ya makulu, ya mwana ya nsuka ya Nzambi yina ke bikala mpe ke kota na Kimfumu.

⁶⁵ Kana na kati ya bayina me telemisa maboko ya bawu, Mfumu, ya kele na bansumuki, vulusa bawu. Bayina me vutuka na manima, bika bawu zaba ti bawu fwana ve kubikala retrograde. Yandi lenda kubaka mwelo yina ya ki-retrograde. Ya lendaka vwanda ti muntu yina kele na nkadulu ya nganzi, yinwa yina ke tuba mambu ya buzoba, ya mvindu, to ntima yina ke na kulula, to ya bwimi, ya mbongo, to—to mwa bima ya mvindu, bika bawu zaba ti bawu lenda baka mwelo yina. Ntangu yankaka ya kele kimbevo, Mfumu, bampasi. Bawu lendaka kubaka kielo yina, “Samu Yandi lwalaka samu na bayimbi ya beto, monaka mpasi samu na masumu ya beto ya nkú. Kitumbu ya ngemba ya beto kubwaka na zulu ya Yandi, mpe na nzila ya bamputa ya Yandi beto me beluka.” Beto kele minungi, na suka yayi. Pesa yawu, Mfumu.

Mpe na nganda ya nionso yina, ya ksalu yina ya nene Yandi salaka, Yandi kele na beto. Kasi, Yandi silaka ti Yandi ke sala yawu. “Na mwa ntangu fioti mpe yinza ke mona Munu diaka ve, kasi beno ke mona Munu; samu Mu ke vwanda na beno, mpe na kati ya beno, tii na nsuka ya nsungi.” Mu ke sambila, Tata, ti Nge ke kukitalisa Nge mosi na muntu nionso, na suka yayi. Samu beto ke lomba yawu na Nkumbu ya Yesu. Amen.

66 Beno ke kwikila ti ya kele Kieleka? Ya kieleka beno kwikila yawu ti ya kele Kieleka, ata mwa ndambu ya ntembe ve na kati ya ntima ya beno. Ntangu yayi beno bambuka moyo na yayi. Kisalu ya Mpeve-Santu kele mpasi ve ti ya ke vwalangisa mpeve ya muntu ya mayele. Bima ya kukondwa mpasi yina mu me monaka ntete. . . Mu me monaka Mpeve-Santu ke sala yawu. Mu vwandaka tuba bima yina, na yina, mu banzaka ve ti ya vwandaka mutindu yina. Kana mu ke sadila mayele ya munu mosi, mu ke tuba, “Mbote, yina ke vwanda mbote ve.” Kasi ya kele ntangu nionso ya kusungama. Yandi ke sala kaka bima ya kukondwa mpasi. Mpe Yandi ke sala bima samu na kukitalisa Yandi mosi na bantu ya Yandi. Nzambi kele na bantu ya Yandi. Yandi kele na kati-kati ya bantu ya Yandi. Yandi ke zolaka bawu. Mpe Yandi ke zola kusala kima mosi samu na bawu, mpe samu na kusadisa bawu; mpe samu kaka bawu zaba, yina ve Yandi ke sala, kasi Yandi me sala. Yandi me sala yawu dezia. Ya kele ya beno. Ya kele kima ya beno. Ya kele dikabu ya mpamba me katuka na Nzambi Tata ya beto, samu na Dibuundu ya Yandi.

67 Ntangu yayi wapi mutindu mpeve ya muntu ya mayele ke vwalangana, mutindu ya vwandaka na bilumbu ya Daniel, mpe na bilumbu ya bana ya ba-Hebreux, mpe—mpe mingi yina beto me zonzila na suka yayi. Beno me mona, yinza ya nene ya bantu ya mayele na kilumbu yina vwandaka kaka mpasi na kununga mutindu ya kele bubu yayi. Ya kele ntangu nionso mbeni, na mutindu ya bawu ya kumona, mpe science ya bawu ya bilumbu yayi mpe nionso yina, vwandaka kaka mpasi mpe bima nionso yina, samu na mpeve na ntangu yina, mutindu ya kele bubu yayi. Beno me mona, ya vwandaka kaka mutindu mosi. Kasi ya vwandaka na bayina, ntangu nionso, yina mekaka na kubikala kuna mpe kutuba, “Nzambi kele ya kusungama. Ndinga ya Nzambi kele kieleka.”

68 Mpe, beno, beno fwana ve kununga, samu ti Yandi nungaka. Kima mosi kaka beno fwana sala kele kukwenda kuna mpe kubaka yawu, kutelama na mwelo, kutuba, “Ya kele ya munu. Yayi kele ya munu. Nzambi pesaka yawu na munu, mpulusu ya munu. Kana mu ke zola Mpeve-Santu, Nzambi me pesa Yawu na munu. Nsilulu kele ya munu, na bana ya beto, na bayina nionso kele ntama, ya kulutila mingi Mfumu ke bokila.” Yawu yina mu me telama. Kaka . . .

69 Ministere ya munu, yayi ya kuswasikisa mabanza mpe nionso yina, ke suka ntama mingi. Oh, ya ke vwanda ntangu nionso kuna. Kasi ya ke suka ntama mingi ve, samu ya ke vwanda na kima mosi ya kulutila nene. Beno me mona? Ya ke na kukwenda na ntwala; ya bandaka na kusimba diboko, ya lutaka na kuswasikisa mabanza, mpe ntangu yayi ya ke zola kusala yankaka. Beno me mona? Beno tala yawu. Beno tala yawu mbote mpe beno ke zaba ti ya kele kieleka. Beno me mona? Mu zaba ti ya kele Kieleka. Mpe ya ke kuma nene mingi, ya ke vwanda

ya zulu mingi, ya ke vwanda ya nkembo mingi. Ya kieleka. Na yina, Yandi silaka yawu. Mpe yina Yandi silaka, Yandi ke sala yawu. Yandi lenda ve kubwa na nsilulu ya Yandi. Mpe yinki yina? Mvwandulu ya Yandi ya ntangu nionso na beto, samu ti, samu beno zaba ti Yandi me baka kielo samu na beno.

⁷⁰ Yandi vwandaka Nkuna ya Kimfumu. Muntu mosi ve lendaka baka bielo yina kasi Yandi. Bayina nionso kuna vwandaka bivudi ya nkwezulu ya Yandi. Kasi ntangu Yandi kwisaka, ya manisaka bitumba nionso. Bitumba manaka na Gethsémané mpe na Calvaire. Mpe ntangu yayi beto kele kaka, minungi. Ya kele ve na bitumba ya kunwana. Beto. . . Bitumba me kumana. Beto me baka yawu kaka, beto ke na mukanda ya yawu. Kipiku yina me sonama na Nzambi, Tata ya beto, Yina zangulaka diboko ya Yandi, tubaka, “Mu ke zenga ndefi na Munu mosi ti Nkuna ya yandi ke baka mwelo ya mbeni ya yandi.” Yawu yina. Ba me baka yawu dezia. “Yandi *me* lwalaka samu na bayimbi ya beto. Na bamputa ya Yandi beto *me* beluka.” Ya me salama dezia. Ya kele kisalulu yina me kumana. Beto me kubaka yawu. “Mpe bisalu yina Mu ke sala, beno mpe ke sala yawu.” Ntinu kele na beto, na suka yayi. Masakumunu ya Yandi ya nene, Mpeve-Santu, ke tambula na zulu ya beto. Samu na kutalisa nsatu yina ya nkembo, samu na kuzaba ti ya kele kieleka na. . . na ndonga na Ndinga ya Nzambi. Ya ke pesa beto nkendusulu ya kitoko, na kuzaba ti—ti Nzambi kele Tata ya beto.

⁷¹ Ntangu yayi, mu ke kwikila, yandi—yandi me kabula bakalati ya bisambu na suka yayi? Mu tubaka na yandi, yinga, kana ya kele kaka na bantu ya tabernacle awa, na yina, kukabula ve bakalati ya bisambu. Kasi kana ya ke—ya ke vwanda na bantu mingi mutindu kumi, kumi na tanu, to kima mosi, banzenza na kati ya beto, na yina, kabula bakalati ya bisambu, na yina beto ke bokila bawu na ntwala mpe beto ke sambila samu na bawu. Bantu yikwa kele banzenza na kati ya beto na suka yayi? Beno telemisa maboko ya beno. Oh, la la! Ya kieleka. Ya kele na bantu kumi na tanu to makumi zole. Mbote mingi. Beto ke tula na ndonga bayina kele na bakalati ya bisambu mpe beto ke matisa bawu awa na estrade. Beno me mona, yawu yina mu me tuba yawu samu na bantu ya “tabernacle,” bawu kele awa.

⁷² Kuswasikisa yayi ya mabanza. Beno bambuka moyo, mu ke tuba na beno yayi. Kuswasikisa mabanza ke suka ntama mingi ve. Ya ke vwanda na kima mosi ya kulutila nene mpe ya nkembo mingi, ya ke na kukwisa. Ya vwandaka, yina mu me zaba, mu ke na kutala bampangi zole ya babakala, yina vwandaka na munu kuna mazono, ntangu ya salamaka, beno me mona, mpe kilumbu mosi na ntwala, ntangu ya salamaka. Mpe yayi kele mbala ya tatu na kulanda, ntangu yayi, ya me salama, nsiamisa ti ya me kuma kaka pene-pene, beno me mona, ya ke zola kusalama.

⁷³ Ntangu yayi, Mfumu, Nge kele Nzambi, mpe beto kele bisadi ya Nge. Beto ke vutula na Nge matondo samu na Ndinga ya

Nge, samu na Mpeve-Santu, Yina me sakumuna bantima ya beto. Mpe ntangu yayi beto kele na kiese. Beto me vwanda awa, na kuzabaka ti beto kele minungi. Beto me baka dezia mielo nionso ya mbeni. Ba me pesa yawu na beto, mpe beto kele na passepartout na maboko ya beto. Nkumbu ya Yesu Klisto ke zi- . . . ke zibula mielo nionso ya mbeni. Beno baka fungula yayi, fungula ya Nkumbu ya Yesu, mpe beno zi- . . . beno zibula konso mwelo yina mbeni me tula na ntwala ya beno samu na kukanga beno nzila na bansilulu.

Mpe, Nzambi, na suka yayi beto ke kwisa na Nkumbu ya Yesu, na fungula yayi, samu na kuzibula mielo samu na bambevo mpe bantu yina kele na mpasi. Samu ya me sonamaka na—na Ndinga ya Yandi, “Na Nkumbu ya Munu ba ke basisa bampeve ya yimbi. Ba ke tuba bandinga ya malu-malu. Mpe kana bawu simba banioka, to bawu kunwa ndikila, ya ke sala bawu yimbi ve. Ba ke ntentika maboko ya bawu na zulu ya bambevo mpe ba ke beluka.” Beto me zaba ti bima yina kele ya kieleka. Mpe pesa, na suka yayi, Mfumu, ti bawu kuzaba, bantu kuzaba ti, na nzila ya kumonisama ya Ndinga yina me kuma nzutu mpe ke zinga na kati ya beto, ti, “Yandi lwalaka samu na bayimbi ya beto; na bamputa ya Yandi beto me beluka.” Mpe bika ti bawu kundima yawu mpe bawu beluka, na suka yayi, na bimbevo ya bawu na maladi ya bawu mpe bampasi ya bawu. Beto ke lomba yawu na Nkumbu ya Yesu. Amen.

⁷⁴ Nge zola kubula, Teddy, *Kwikila Kaka*, na lembami mpe malembe, kana nge me zola.

Yinki? Nge ke zola ti mu banda na mosi? Numelo mosi, kalati ya bisambu. Mosi, zole, tatu, yiya, tanu, sambanu, sambwadi, nana, yivwa, kumi, to nionso yina ya kele. Mbote mingi. Beno ke zola kutelama, na lembami, beno kwisa na lweka yayi.

[Muntu mosi me tuba, “Bantu yikwa nge me bokila?”—Mu.] Huh? [Muntu mosi me tuba, “Yawu yina. Yawu yina.”] Samu na . . .

Beto tala, numelo mosi, numelo ya zole. Nani kele na kalati ya bisambu numelo mosi? [Mpangi-bakala mosi me tuba, “Mu ke na yawu.”—Mu.] Yinga. Numelo ya zole. Mbote mingi, tata. Numelo ya tatu, numelo ya yiya, numelo ya tanu, numelo ya sambanu, numelo ya sambwadi, numelo ya nana, numelo ya yivwa, numelo ya kumi.

⁷⁵ Mutindu ba ke na kukwisa na ntwala samu na kubaka kisika ya bawu ya kutelama, mu ke zola kuyufula kiuvu na bayankaka na kati ya beno. Banani, bantu yikwa awa na tabernacle, yina kele ya kubela? Bantu ya tabernacle, beno telemisa maboko ya beno. Pene ya tanu . . . yiya, tanu, sambanu, sambwadi, nana. Maboko nana to yivwa. Ya kele na muntu awa na tabernacle, yina kele ve ya tabernacle, ba kele banzenza na kati ya beto, ya lendaka vwanda ti beno me kuma na manima ya lukutakanu mpe

vwandaka me baka ve kalati ya bisambu? Beno lenda telemisa maboko ya beno? Muntu nionso yina kele na nsatu ya Nzambi, yina kele ve. . . yina—yina ke kwisaka ve na tabernacle yayi. Bantu yina kele awa yina kele ve bamambeke ya tabernacle yayi, mpe—mpe kasi beno kele ya kubela mpe beno kele ve na kalati ya bisambu, beno ke zola ti ba bambuka beno na bisambu? Beno ke zola kutelemisa maboko ya beno, beno nionso? Mbote mingi. Yina kele mbote. Mbote mingi.

⁷⁶ Ntangu yayi mu ke lomba na beno na kuvwanda kaka na luzitu mutindu beno lendaka, samu kaka—kaka na mwa minuti fioti, na manima beto ke banda mbala mosi. Ntangu yayi beto tala. Nge me bikala na bisika yikwa, Billy? Mbote mingi. Nge ke na numelo ya kumi kuna? Mu me bokila kubanda na mosi tii na kumi.

Kumi na mosi, kumi na zole, kumi na tatu, kumi na yiya, kumi na tanu, kutelama ntangu yayi. Bayina kele na numelo ya kumi, kumi na mosi, kumi na zole, kumi na tatu, kumi na yiya, kumi na tanu, bawu telama. Mbote mingi. Mosi, zole, tatu, yiya, tanu, sambanu, sambwadi, nana, yivwa, kumi, kumi na mosi, kumi na zole. Ya ke kondwa zole diaka, kubanda na mosi tii na kumi na tanu. (. . . ? . . . sambwadi, nana, yivwa, kumi, kumi na mosi.) Kumi na tanu, kumi na sambanu, kumi na sambwadi, kumi na nana, kumi na yivwa, makumi zole.

⁷⁷ Oh, beno vingila fioti. Mu—mu tubaka na yandi kaka na kupesa bakalati ya bisambu na bantu yina kele ve ya tabernacle. Ya kele mbote. Beno me mona? Samu, ya ke vwanda, beno me mona, na kuswasikisa mabanza. Bantu ke tuba, “Bantu yayi ke kwisaka na tabernacle.” Beno me mona? Mu—mu ke tuba na beno. Bantu yikwa me vwandaka awa. . . bantu yikwa me kwisaka awa ntete ve? Beno telemisa maboko ya beno, muntu mosi ve me vwandaka ntete na balukutakanu ya munu. Mbote mingi. Mbote mingi.

Ntangu yayi, mbote mingi, vingila fioti, Mpangi Teddy.

⁷⁸ Ntangu yayi mu ke zola kutuba mutindu yayi, ti, beno nionso me kuwaka, mutindu balukutakanu ke tambulaka, ti, beno nionso, me vwandaka ntete na balukutakanu? Beno me mona? Ntangu Mfumu ya beto Yesu vwandaka awa na zulu ya ntoto, Yandi tubaka ve ti Yandi kele munganga. Yandi vwandaka Nkuna ya Abraham, ya kieleka, mpe Yandi vwandaka na nsilulu na Yandi. Yandi tubaka ti Yandi vwandaka sala kima ve tii ntangu Tata ke lakisa Yandi. Ya kele kieleka? Mpe Yandi tubaka, “Mu ke sala kima mosi ve tii kuna Tata ke lakisa yina mu ke sala.” Mpe Yandi monaka yawu na nzila. . . Ya kele ve “tii kuna Tata ke *tuba* na Munu.” “Tii kuna Tata ke *lakisa* Munu.” Santu Jean 5:19, “Yina Mu ke mona Tata kusala, ya kele yina Mwana ke sala mutindu mosi.”

⁷⁹ Ntangu yayi ntangu Yandi—Yandi kwisaka, beto ke mona ti, na mbandukulu ya ministere ya Yandi, na manima Yandi babaka kiti ya David. . . [Kisika ya mpamba na bande—Mu.] Na nzonzolo ya kimpeve, . . .

Ntangu Mpeve-Santu kwisaka na zulu ya Yandi na mbotika, ya Jean, mpe Yandi kumaka Mesiya yina ba me pakula. Ntangu yayi, beno bambuka moyo, Yandi vwandaka Mwana ya Nzambi ntangu Yandi butukaka. Yandi vwandaka Mwana ya Nzambi yina me butuka na mwense. Kasi ntangu Yandi kumaka Mesiya, ya kele ntangu yina Mpeve-Santu kwisaka na zulu ya Yandi, samu *mesiya* zola kutuba “yina ba me pakula.” Beno me mona? Mpe Yandi vwandaka Mupakulami ntangu Mpeve-Santu kwisaka na zulu ya Yandi. Beno kuwaka munu ke longi na zulu ya *Mwana-dimeme Mpe Yembe*. Na yina beto ke mona ti, ntangu Yandi. . . Na manima bilumbu makumi yiya ya mpukumunu, Yandi basikaka.

⁸⁰ Mpe wapi mutindu ministere ya Yandi kubandaka, mpe wapi mutindu yawu sukaka? Beto ke mona ti, na ministere ya Yandi ya vwandaka na muntu mosi na nkumbu ya André, yina kwendaka kumona mpangi ya yandi, Simon, mulobi mbisi, mpe ya nataka yandi na Yesu. Mpe Yesu tubaka na yandi, yandi tubaka, “Nkumbu ya nge kele Simon. Nkumbu ya tata ya nge kele Jonas. Kubanda ntangu yayi ba ke bokila nge *Pierre*, yina zola kutuba ‘ditadi ya fioti.’” Beno ke bambuka moyo na yawu? Mpe muntu yayi kuyitukaka mingi samu na yina Yesu tubaka na yandi!

Ntangu yayi, Mesiya zolaka kusala mutindu yina? Bantu yikwa me zaba yawu, beno tuba, “Amen.” Yandi zolaka vwanda Nzambi-Profete. Yinga, tata. Moise tubaka, “Mfumu Nzambi ya beno ke telemisa Profete mosi mutindu munu. Muntu yina ke kuwa ve Profete yayi ba ke katula yandi na kati-kati ya bantu.”

⁸¹ Ntangu yayi, na yina ntangu beto ke mona ti, na ntwala, ya Yandi. . . “Yandi kwisaka na Bantu ya Yandi.” Banani ba vwandaka? Ba-Juif, na kimuntu. “Mpe na yina Bantu ya Yandi kuyambaka Yandi ve,” na yina Yandi me. . . Ntangu yayi ya fwana kwenda na Bantu ya makanda, beno me mona, samu Bantu ya Yandi kuyambaka Yandi ve. “Kasi na bayina yambaka Yandi, Yandi pesaka bawu kiyeka ya kukuma bana ya Nzambi.” Na yina ntangu yayi Yandi me baluka na Bantu ya makanda, mpe kubanda bamvula mafunda zole. Kasi ntangu yayi beno tala mambu yina Yandi salaka.

⁸² Na yina Philippe, na manima yandi monaka yayi kusalama, yandi kwendaka mona Nathanaël, mpe yandi tubaka na Nathanaël nani yandi monaka mpe yina Yandi salaka. Mpe yandi yitukaka mingi samu na yawu. Yandi lendaka na mpasi kukwikila yawu. Kasi ntangu yandi kotaka na Mvwandulu ya Mfumu Yesu, ntangu yandi monaka Yandi, ntangu yandi kotaka

na Mvwandulu ya Yandi, Yesu tubaka, “Beno tala Israélite yina na yandi luvunu kele ve.”

⁸³ Ntangu yayi, kana beno vwandaka kuna, beno ke banza ti beno zolaka vwanza ya kimpeve mingi samu na kubakula Nana ya vwanza? Beno banza ti beno zolaka sala yawu? Beno tala mbote ntangu yayi. Beno me mona? Bakala yina, Nzenza mosi, mu- . . .kuna, Yandi vwanza mulobi mbisi. Yandi vwanza charpentier, yawu yina Yandi vwanza. Bakala yayi ya charpentier vwanza ya kutelama kuna, Bakala mosi ya bamvula ya kati-kati. Mpe bakala yayi kwisaka kuna. Yandi talaka yandi, mutindu mosi ya babakala yayi kele awa, yandi tubaka, “Beno tala Israélite yina na yandi luvunu kele ve.” Mbote, wapi mutindu Yandi zabaka ti yandi vwanza Israélite? Ya kele ve mutindu yandi vwanza me lwata, samu bawu nionso vwanza lwata mutindu mosi. “Na yandi yina luvunu kele ve.” Wapi mutindu Yandi zabaka ti yandi vwanza ve muntu ya luvunu?

⁸⁴ Muntu yayi yitukaka mingi samu na yawu. Mutindu ya vwanza mukwikidi ya kieleka, yandi tubaka, “Rabi,” to mpangi-bakala, mulongi, mulongisi, “wapi ntangu Nge monaka munu?” Beno me mona, yandi yifulaka Yandi.

⁸⁵ Yandi tubaka, Na ntwala Philippe kubokila nge, ntangu nge vwanza na nsi ya yinti, Mu monaka nge.

Yandi tubaka, “Nge kele Mwana ya Nzambi. Nge kele Ntinu ya Israël.”

⁸⁶ Yesu tubaka, “Samu Mu me tuba yayi na nge, ntangu yayi nge me kwikila na Munu? Ntangu yayi nge ke mona mambu ya nene kulutila yayi.”

⁸⁷ Mpe yawu yina mu ke kwikila ti Dibuundu ya Nzambi ya moyo ke mona kima ya nene kulutila yayi. Ya me belama na kukota kuna, ntama mingi ve, beno me mona, samu ba me kwikila yawu. Bayina losaka yawu, samu na bibaka ya denomination, mu ke tula ntembe ti ba ke kwikila kima mosi ve. Beno me mona? Bima . . .Beno ke tambula na kati ya Nsemo to beno ke vwanza mpofo. Nsemo ke kufwaka meso, to ya ke lakisaka nzila.

⁸⁸ Mu monaka, mwa bandeke ya fioti, na Kiteki ya Kimpwanza. Ya kieleka nge mona yawu, Mpangi Thoms, ntangu nge ke kwenda kuna, nge me mona. Ba vwanza panzana bayintu, na kubulaka yawu kuna. Mpe mu tubaka, “Yinki vwanza diambu?”

⁸⁹ Yandi tubaka, “Na kisika ya kulanda nsemo, na kati ya kitebo, na kisika ya lukengolo, ba vwanza meka na kufwa nsemo na kubulaka yawu. Ba me kukifwa bawu mosi.”

⁹⁰ Yawu yina kaka ke salama ntangu beno ke nwanisa Nsemo, beno ke kukifwa beno mosi, na kimpeve. Beno tambula kaka na

kati ya Nsemo mutindu Yandi kele na kati ya Nsemo, na manima beto ke vwanda na kimpangi mosi na yankaka, mabuundu nionso ke kwikila mpe ke kwenda na ntwala na kusepelaka samu na masakumunu ya Nzambi. Ya ke vwanda kitoko ve?

⁹¹ Beno tala kento yina ya Samarie ntangu yandi kwisaka. Yandi vwandaka muntu ya Samarie, ntangu yayi (Juif ve), muntu ya Samarie. Mpe Yandi tubaka, “Natila Munu masa ya kunwa.” Mpe disolo kwendaka na ntwala.

Yayi kele samu na banzenza ntangu yayi.

⁹² Mpe disolo kwendaka na ntwala. Ntangu yayi, yandi zabaka ve ti Yandi vwandaka Mesiya. Yandi vwandaka kaka Muntu, Juif. Beno tala yina yandi tubaka na yandi na kubanda? Yandi tubaka, “Kasi, ya kele ve mumesanu samu na beno ba-Juif na kusolola na kento ya Samarie mutindu yayi.” Yandi tubaka, “Beto kele ve na ngwisani mosi na yankaka.”

⁹³ Yandi tubaka, “Kasi kana nge zabaka na Nani nge vwandaka tuba, nge zolaka lomba Munu masa ya kunwa. Mpe Mu zolaka natila nge, kupesa nge masa, nge ke kwisa awa ve samu na kubaka yawu.”

⁹⁴ Na yina, yandi tubaka, “Ntangu yayi vingila fioti.” Yandi tubaka, “Beto ke sambilaka na mongo yayi, mpe—mpe beno ba-Juif ke sambilaka na Jérusalem.”

⁹⁵ Yesu tubaka, “Kasi ngunga ke kwisa ntangu—ntangu beno ke sambila ve na Jérusalem to na mongo yayi, kasi na Mpeve. Samu Nzambi kele Mpeve, mpe bayina ke sambila Yandi fwana kusambila Yandi na Mpeve mpe na Kieleka.” Beno me mona? Mbote, Yandi landilaka, landilaka disolo tii Yandi monaka kisika diambu vwandaka. Na yina, beno me zaba yinki vwandaka diambu ya yandi? Muntu nionso me zaba yinki vwandaka diambu ya kento yina na dibulu ya masa? Yandi vwandaka na babakala mingi, mutindu yina ve? Na yina Yandi tubaka na yandi, “Kwenda bokila bakala ya nge mpe yandi kwisa awa.”

Yandi tubaka, “Mu ke na bakala ve.”

⁹⁶ Yandi tubaka, “Ya kieleka. Nge vwandaka na tanu, mpe yina ke na kuzingaka na nge ntangu yayi kele ya nge ve.”

⁹⁷ Yandi tubaka, “Tata!” Ntangu yayi beno tala yandi mbote. “Tata, mu ke mona ti Nge kele Profete.”

Kana beno tala note yina ya lweka kuna, beno ke mona. “Tata,” na mbandukulu, “Nge kele, mu ke mona, ti Nge kele Profete *yango*.” Beno bambuka moyo, na kati ya Biblia, ya ke tuba kaka, “Profete yango, Nge kele ‘Profete yango?’” Wapi mutindu ya Profete ya vwandaka? Yandi yina Moise tubaka ke telema.

“Mu ke mona ti Nge kele Profete. Ntangu yayi, ba tubaka na beto, mpe beto me zaba ti ntangu Mesiya ke kwisa, Yandi ke sala bima yayi.” Yina vwandaka kidimbu ya Mesiya. Ya kieleka?

Samu na kuzaba yina vwandaka diambu ya yandi. Yandi tubaka, “Beto me zaba ti ntangu Mesiya ke kwisa, Yandi ke tuba na beto mambu yayi. Kasi Nani Nge kele?”

Yandi tubaka, “Mu kele Yandi, yina ke na kuzonza na nge.”

⁹⁸ Yandi bikaka dibungu ya yandi ya masa. Yandi kwendaka mbangu na kati ya mbanza, mu ke banza, diboko kaka na zulu ya ntima ya yandi. Mpe na kutubaka, na maboko ya yandi na zulu ya ntulu ya yandi, na kutubaka, “Beno kwisa tala, Muntu Yina me tubaka na munu mambu yina mu salaka. Yayi kele Mesiya ve? Yayi kele Yandi yina ve Biblia me tuba ti Yandi ke kwisa? Ya kele Juif mosi ya kuvwanda kuna, Muntu mutindu bantu nionso, ya ke monana mutindu charpentier. Kasi Yandi me tuba na munu ti mu vwandaka na babakala tanu, mpe beno nionso me zaba ti ya kele kieleka. Yayi fwana vwanda Mesiya.” Ya kieleka?

⁹⁹ Ntangu yayi, Yesu tubaka, “Na manina ya mwa ntangu fioti, na mwa kitamina ya ntangu, yinza ke mona Munu diaka ve. Kasi, beno ke mona Munu, samu Mu ke vwanda na beno, mpe na kati ya beno. Mpe bisalu yayi Mu ke sala beno mpe ke sala yawu. Ata mpe kulutila yina Mu me sala awa, beno ke sala, samu Mu ke kwenda na Tata, mpe ke vutuka na mutindu ya Mpeve.”

Ba me futa munkayulu. Nkuna ya Kimfumu me kufwa; Nkuna ya Kimfumu me vumbuka na lufwa. Ntangu yayi Dibuuundu me telama ya kunungisama, na kukwikilaka yawu, mpe Nkuna ya Kimfumu lendaka kukota na bantu yayi mpe kusala bawu bilandi kintwadi, bana-babakala mpe bana-bakento ya Nzambi.

¹⁰⁰ Ntangu yayi, samu na beno bayankaka kuna, yina kele ve na ndonga ya bisambu, mu tubaka na yandi na kupesa kaka bakalati na bantu yina. . . ntangu mu bokilaka yandi na suka yayi. Yandi bokilaka munu, yandi tubaka, “Nge ke zola ti mu kwenda kukabula bakalati, papa?”

¹⁰¹ Mu tubaka, “Kana ya kele kaka na bantu kumi yina kele ya tabernacle.”

¹⁰² Ntangu yayi, bantangu yankaka na tabernacle mu ke bokila bawu mpe mu ke pesa bawu bakalati ya bisambu. Beno ke kwisa vutuka, beno ke tuba, “Mbote, yandi me zaba bawu. Ba vwandaka ya tabernacle. Yandi zabaka diambu ya bawu. Ya kieleka.”

¹⁰³ Na manima mu ke kwisa, mu ke tuba, “Kaka bayina kele ve ya tabernacle, beno kwisa. Mbote mingi. Beno yina kele ve ya tabernacle yayi, beno kaka ke kwisa na ndonga ya bisambu.”

¹⁰⁴ “Oh, beto vwandaka zaba bawu ve,” bantu ya tabernacle ke tuba. “Beto me zaba ve yina kele diambu ya bawu. Yandi lenda tuba luvunu samu na diambu ya bawu.” Beno me mona?

105 Na yina mu ke tuba, “Ti ata muntu ve kukwisa. Bika ti Mpeve-Santu kupona kaka bayina kele awa yina kele ve ya tabernacle, mutindu ba me vwanda kuna.” Kasi, kuna diaka . . .

106 Ya kele ata fioti ve, na mutindu ya kunata muntu mosi na Nzambi, kaka kana ba zabaka yandi na mantwala samu na kuvwanda mwana ya Nzambi. Ya kele ve na mutindu ya kusala yawu. Yesu tubaka, “Muntu mosi ve lenda kwisa na Munu kana Tata ya Munu me benda yandi ve.” Mpe yina kele Kieleka. Bima nionso Yandi salaka, ya vwandaka na kima mosi ya kuswaswana. “Kana Yandi salaka yawu mutindu *yayi*, ya zolaka vwanda mutindu *yayi*. Mpe mutindu *yayi*, ya zolaka vwanda mutindu *yina*.” Beno me mona, ya kele kaka kukondwa lukwikilu. Kasi ndwenga ba me nungisa yawu na nzila ya bana ya yandi. Na yina, beno, beno me mona.

107 Ntangu yayi awa, mu ke meka na kutuba na—na nkonga yayi ya bantu, bantu yayi, ti Yesu Klisto vwandaka Nkuna yina ya Kimfumu. Ya kele ve beto; ya kele Yandi. Beto kele kaka bilandi ya yawu, kasi bima nionso kele ya beto. Yinki kana beno zolaka vwanda kuna kilumbu yina ntangu Simon kwisaka? Mpe, beno, muntu mosi ve. . . Yayi kele kima ya ntete Yandi salaka.

108 Ntangu yayi, ya ke vwanda kima ya ntete samu na bantu yayi, kana Yandi ke sala yawu. Ba me monaka yawu ata fioti ve.

109 Kasi ntangu Simon kwisaka, kiboba ya mulobi mbisi, yandi longukaka mingi ve samu na kusonika nkumbu ya yandi na zulu ya mukanda. Biblia me tuba yandi vwandaka “muntu ya kukondwa mayele mpe muntu yina longukaka ve.” *Mpe* kele kivukisi. Nionso zole, “muntu ya kukondwa mayele mpe muntu yina me longukaka ve.” Na yina ntangu Yandi kwendaka kuna, na kidimbu, ngolo mosi. . . Yesu, Yesu tubaka, “Nkumbu ya nge kele Simon.” Yinki beno ke banza yandi banzaka? Yinki beno zolaka banza kana beno zolaka kuvwanda kuna? “Mpe nkumbu ya tata ya nge kele Jonas. Mpe kubanda bubu yayi ba ke bokila nge Pierre.” Yinki, yinki beno zolaka banza? Muntu yayi vwandaka tanga mabanza ya yandi? Mbote, yinki beno zolaka banza? Beno zolaka banza ti ya vwandaka kidimbu ya Mesiya?

110 Kana yina kele kidimbu ya Mesiya na nsungi mosi, ya fwana vwanda kidimbu ya Mesiya, na nsungi ya zole, na nsungi ya tatu, na nsungi ya yiya. Ya fwana vwanda mutindu mosi na konso nsungi, samu Nzambi lendaka ve kusoba. Mpe bantu yikwa me zaba ti Mesiya vwandaka Nzambi? Ya kieleka. Yandi vwandaka Mupakulami. Ya kieleka. Na yina Yandi lendaka ve kusoba. Yandi fwana vwanda mutindu mosi.

111 Yawu yina Yandi pesaka kimbangi ya kima ya mutindu mosi na bantu ya Samarie mutindu Yandi salaka na ba-Juif. Samu, ya kele na bantu ya dikanda ya Cham, Sem, na Japhet; ba-Juif, Bantu ya makanda, mpe ba-Samaritain.

¹¹² Ntangu yayi, beno me mona Mpeve-Santu? Bantu yikwa me zaba ti Pierre vwandaka na bafungula ya Kimfumu? Beno me bakula? yandi zibulaka yawu na Kilumbu ya Pentecote, samu na ba-Juif. Philippe kwendaka kuna mpe yandi longaka na bantu ya Samarie, mpe yandi botikaka bawu na Nkumbu ya Yesu Klisto, kasi Mpeve-Santu kwisaka ntete ve na zulu ya bawu. Ba kwendaka bokila Pierre, yina tentikaka maboko ya yandi na zulu ya bawu mpe bawu kuzwaka Mpeve-Santu. Ya kieleka? Mpe na yinzo ya Corneille, Bantu ya makanda kuzwaka Yawu. Bantu nionso kuzwaka yawu. Kubanda na ntangu yina, ya me zibuka samu na muntu nionso ntangu yayi. Na yina, beno me mona, Yandi zolaka kuzibula yawu. Nzambi kele na bafaso ya kusala mambu.

¹¹³ Ntangu yayi, na suka yayi, kana Yandi Yina pesaka Nsilulu na Nkuna, mpe kana nkuna kele ya kuvwanda awa... Mu ke zola kukwikila ti mosi na mosi ya beno kele mosi ya yawu. Kana Nkuna kele ya kuvwanda awa, ya kieleka Nkuna ke mona Nsilulu. Ntangu yayi, bantu yayi nionso kele ya kutelama awa me telemisa maboko ya bawu, ba me vwandaka ntete ve na balukutakanu yayi. Ba kele banzenza samu na munu. Mu me zaba ve mosi na kati ya bawu. Ba me kwisa kaka awa. Mpe na mwa ntangu fioti me luta, Billy me pesa bawu kalati ya bisambu, mpe bawu yayi me telama awa. Beno kele bantu mingi kuna, me telemisa maboko ya beno, samu na kutalisa ti beno kele ve na bakalati ya bisambu, mpe beno kele kaka banzenza awa. Yina ke sala kima mosi ve. Beno ke kwikila kaka ti beno kele kilandi ya nsilulu yina. Beno ke kwikila kaka ti na bamputa ya Yandi beno me beluka. Mpe beno kwikila yawu na ntima ya beno ya muvimba, mpe beno tala na Yandi.

¹¹⁴ Dikabu yayi ke lomba kaka, kukipesa beno mosi na Yandi. Mu ke tuba kima mosi ve; ya kele Yandi ke tuba. Mpe kana Ya kele Mpeve ya Yandi ya profesi, profete ke vwandaka ntangu nionso na MUTINDU ME TUBA MFUMU. Ya vwandaka ntangu nionso kieleka. Mpe ya me tala ve Malongi, samu ya fwana kusungama na Biblia, kana ya kele Nzambi. Nzambi lendaka ve kutuba kima mosi, mpe samu na kuvutuka kuna mpe kusoba yawu. Ya ke vwanza mutindu mosi ntangu nionso.

¹¹⁵ Ntangu yayi, beno yina kele kuna, beno kwikila. Na nionso yina kele na kati ya beno, beno kwikila. Ntangu yayi beno tambula diaka ve. Beno bikala kaka ya kuvwanda swi ntangu yayi, beno nionso.

Na lembami nionso mpe na pima nionso mutindu nge lendaka kusala yawu.

Ya me salama, na suka yayi, ti muntu ya ntete na kukwisa awa kele bakala. Ntangu yayi beto ke baka Masonuku yayi.

¹¹⁶ Ntangu yayi beno me mona kisika mu me telama? Bantu yikwa lendaka bakula yawu? Awa kele babakala mpe bakento

me telama awa, yina mu me monaka ntete ve, na luzingu ya munu. Ba me vwandaka ntete ve na balukutakanu, mpe beno me mona kisika ba me telama. Ba me zaba ve yina ke salama. Mu me zaba ve yina ke salama. Kasi Nzambi silaka yawu. Abraham zabaka ve yinki zolaka salama ntangu yandi bakaka mbele samu na kufwa Isaac, kasi Nzambi silaka yandi. Yina sukisaka diambu. Yandi kuzwaka yandi mutindu muntu na kati ya bantu ya kufwa, na kuzabaka ti Yandi vwandaka na kiyeka ya kuvumbula yandi na lufwa. Ya kele kieleka? Na yina ya sukisaka diambu.

117 Ntangu yayi, awa me telama bakala mosi pene-pene ya munu, mu me monaka yandi ata fioti ve, mu me zaba kima mosi ve samu na yandi. Beto kele banzenza mosi na yankaka. Beto me zabana ve mosi na yankaka. Nzambi me zaba beto zole.

Ntangu yayi, na nzila ya dikabu ya Kinzambi, kana mu lendaka kaka na nzila ya dikabu. . . Ntangu yayi, makabu yina me butuka na kati ya beno. Nzambi zabaka na mantwala na ntwala ya yinza kusalama. Bantu yikwa me zaba yawu? Na yina mu salaka kima mosi ve, samu na kuzwa dikabu yayi. Nzambi kaka soolaka yawu mutindu yina. Mu me soolaka yawu ata fioti ve. Yandi soolaka yawu. Beno me mona? Mutindu bapofete ya Ngwisani ya Ntama, mpe bantu ya kuswaswana, ba zabaka bawu na mantwala na kusala yawu, samu na kusala yayi.

118 Ntangu yayi, kana bakala yayi kele ya kubela, mu lenda ve kubelula yandi. Kana bakala yayi kele na nsatu, ya ke tala na mutindu ya nsatu ya yandi kana mu lendaka sadisa yandi to ve. Ya lendaka vwanda, kana ya vwandaka kima mosi mutindu yandi. . . mwa kima yina mu lendaka sadisa yandi, na yina, mu ke vwanda na kiese na kusala yawu. Ya lendaka vwanda ti yandi kele na nkadulu ya nganzi. Ya lendaka vwanda ti yandi kele mpe ve Muklisto. Ya lendaka vwanda ti yandi kele Muklisto. Ya lendaka vwanda ti yandi kele muntu ya luvunu. Mu me zaba ve. Yinki kana yandi kele kaka muntu yina me kwisa kumeka, muntu yina me kota, mpe yandi me kwisa awa na kufwanikisaka kaka kima mosi? Beno tala yina ke salama, beno me mona, beno tala kaka—kaka yina ke salama. Mu me zaba ve.

119 Kasi, beno me mona, na ntangu beno me telama awa, beno lendaka kuvwanda ya kundimisama, na kuzabaka ti Nzambi salaka nsilulu, Nzambi ke zitisaka nsilulu ya Yandi. Beno me mona? Ntangu yayi, kana Nzambi ke zitisaka nsilulu ya Yandi, na kati-kati, kaka awa na ntangu yayi, na bantu yayi; bantu yikwa kele awa, ke kwikila yawu na ntima ya bawu ya muvimba? Na ntima ya beno ya muvimba, beno ke kwikila yawu? Na manima beno ke kwikila munu.

120 Ntangu yayi beto tala. Beto baka Disonuku mosi. Ntangu yayi, Simon Pierre kwisaka na Mfumu Yesu. Mpe ntangu yandi kumaka na Mfumu Yesu, Mfumu Yesu tubaka na yandi nani

yandi vwandaka, mpe—mpe tubaka na yandi bima yina me tala luzingu ya yandi. Mbote, Yesu yina mosi ke zinga bubu yayi. Yandi. . . Beno ke kwikila ti Yandi me vumbuka na lufwa? Beno ke kwikila ti Mpeve ya Mesiya ke zinga na kati ya Dibundu, bubu yayi, kaka mutindu mosi Yandi ke salaka ntangu nionso? Mbote mingi.

¹²¹ Ntangu yayi, beno na kati ya kivinga, yina kele ve na bakalati ya bisambu, beno tala awa mpe beno tuba, “Mfumu!” Ya kieleka, ya kele ve na bakalati ya bisambu na kati ya kivinga, mu kele na bantu na yawu nionso ya kutelama awa. Beno na kati ya kivinga beno tuba, “Mfumu, Nge simba munu.” Beno tala yina ke salama. Beno tala yina ke salama. . . ? . . .

¹²² Ntangu yayi, tata, kana ya vwandaka na mutindu na yinza ya kusadisa beno, mu zolaka kusala yawu. Beno me mona, mu kele kaka, beto kele kaka banzenza awa, mpe mu—mu me kutana na beno samu na mbala ya ntete. Kasi mu kele na kiyeka, mutindu longi, na kutuba Kieleka mpe samu na kuvwanda mhangi ya Yesu Klisto. Mpe, ntangu yayi, mu ke zola ve beno tuba na munu kima mosi. Mu ke zola kaka beno pesa na munu mvutu kana ya kele kieleka to ve, na manima beno bika Yandi kusala kisalu. Mpe kana Yandi ke sala mutindu mosi awa na estrade, na nzila ya nzutu yayi, yina Yandi salaka na nzila ya nzutu ya Yesu!

Ya kele Nzambi, kati na Klisto. Yesu tubaka, “Mu ke sala kima mosi ve tii kuna Tata, yina kele na kati ya Munu, ke lakisa na Munu. Yandi ke tuba na Munu yinki kusala.” Na yina ya vwandaka ve Yesu yina tubaka na kento. Ya vwandaka Tata, na kati ya Yandi, tubaka na kento. Ya vwandaka—ya vwandaka ve Yesu yina zabaka nani Simon Pierre vwandaka, ya vwandaka Tata yina vwandaka zinga na kati ya Yandi, yina zabaka nani Simon Pierre vwandaka. Yawu yina. Beno me mona? Yawu yina.

¹²³ Mu lenda tuba na beno, ntangu yayi, beno kele Muklisto, yinga, tata, samu beno kele na mpeve ya kuyamba na kati ya beno. Mpe, yandi, yandi kele mukwikidi. Yandi kele Muklisto. Mpe beno kele na kimbevo ya kidi-kidi yina ke sala ti beno vwanda na mpasi ya estomac. Ya kieleka? [Mpangi-bakala yango me tuba, “Ya kieleka.”—Mu.] Beno me mona? Beno me mona? Ntangu yayi, yina kele kieleka. Wapi mutindu? Wapi mutindu mu lendaka zaba yawu? Wapi mutindu mu zolaka zaba yawu? Beto me monanaka ata fioti ve mosi na yankaka. Ya kieleka. Mutindu yina? [“Ya kele kieleka.”] Ntangu yankaka Yandi ke tuba na nge kima yankaka samu na nge mosi. Mu ke tuba na nge. Tala kima mosi. Mu ke mona kento mosi pene-pene ya nge. Yandi kele na nge. Ya kele kento ya nge. Yandi mpe kele na nsatu ya lusalusu, mpe. Yinga, tata. Nge ke kwikila ti Nzambi lenda tuba na munu awa yina ke tambula mbote ve na kento ya nge? [“Mu zaba ti Yandi lenda sala yawu.”] Mbote mingi, tata. Yandi kele na mpasi ya ntima, minianga. Ya kieleka. Mutindu yina ve? Kidi-kidi, diaka. Yinga, tata. Ntangu yayi, nge kele ve

muntu ya mbanza yayi. Beno ke vutuka na nzila *yayi* ntangu beno ke vutuka na yinzo, ntangu beno ke kwenda na Cincinnati. Ya kieleka. Beno me katuka na Cincinnati, na Ohio. Nkumbu ya nge kele Milliken. Beno kwenda, beno vutuka na yinzo, beno beluka. Mfumu ke sakumuna nge mpe nge ke beluka, nge mpe kento ya nge. Nzambi sakumuna nge.

Kwisa, tata. Nge ke kwikila? Ntangu yayi beno vwanda kaka na lukwikilu. Beno tula ntembe ve.

¹²⁴ Ntangu yayi beno vwanda kieleka na luzitu. Bantu nionso kuvwanda kieleka na luzitu, beno vwanda pima. Beno me mona, Mpeve-Santu madidi mingi. Bantu yikwa me zaba yawu? Mpeve-Santu, beno me mona, ke vwandaka kieleka madidi, mwa nkakalakani fioti ke niongisa Yandi.

¹²⁵ Landila badokotolo, nge fwana kufwa, na mpasi ya ntima. Ya kieleka. Nge me katuka na Chicago, Tata Mosley. Nkumbu ya nge ya ntete kele Theodore. Nge ke kwikila Nzambi? [Mpangi-bakala me tuba, “Yinga.”—Mu.] Na yina kwenda na yinzo mpe zinga, na Nkumbu ya Yesu Klisto, mpe beluka. Nzambi sakumuna nge.

¹²⁶ Nge ke kwikila Nzambi? [Mpangi-kento yango me tuba, “Ya kieleka. Yinga, tata.”—Mu.] Nge kele na mpasi na dikulu ya nge. Nge kele ya mbanza yayi ve, mpe. Beno me katuka na Owensboro, na Kentucky. Nkumbu ya nge kele Tata Lamb. Vutuka na yinzo mpe beluka.

¹²⁷ Mama yina kele ya kuvwanda kuna, me katuka mpe na Owensboro. Nge kele na kivimbu na zulu ya dibeke ya nge awa. Ba ke zola kupasula nge, mbasi. Kwenda, kwikila, mpe zinga.

¹²⁸ Nge ke kwikila, tata? [Mpangi-bakala me tuba, “Yinga, mu ke kwikila.”—Mu.] Beto kele banzenza mosi na yankaka. Nkumbu ya nge kele Tata Gilmore. Ya kieleka. Nge me katuka na Anderson, na Indiana, kisika Dibuundu ya Nzambi kele na kuningana ya yawu. Ya kieleka. Nge me telama awa samu na mwana ya nge ya kento yina kele ndambu ya kubela. Yandi me simbama ndambu na paralysie. Nge ke kwikila? Na yina kwenda na yinzo mpe nge ke mona yandi mutindu nge ke kwikila. Mbote mingi. Nzambi sakumuna nge. Vwanda na lukwikilu. Kwikila.

¹²⁹ Nge ke kwikila na ntima ya nge ya muvimba, tata? [Mpangi-bakala yango me tuba, “Yinga, tata.”—Mu.] Nge me katuka na Indianapolis. Nge kele longi ya Nsangu ya mbote. Yina kele kento ya nge. Uh-huh. Yandi mpe ke bela. Yandi kele na kimbevo na laka na kati ya laka. Dokotolo . . . Yandi kele na kimbevo ya ntima; mwa kidi-kidi. Mu ke mona ti yandi kele kifwa makutu. Yinki . . . Kwisa awa.

Nge mpeve ya kifwa makutu, na Nkumbu ya Yesu Klisto, mu ke pesa nge kiyeka na nzila ya Nzambi ya moyo, basika na kento yayi.

Na yina nge lendaka kuwa munu mbote mingi ntangu yayi. Nge lenda kwenda na yinzo mpe nge ke beluka. Vutuka na yinzo ya nge. Nge ke kuwa munu, mpe nge me beluka. Nge ke vwanda mbote.

¹³⁰ Nge ke kwikila na ntima ya nge ya muvimba? Beno vwanda kaka na lukwikilu na Nzambi. Beno kwikila.

¹³¹ Arthrite yayi mpe nionso yayi kele kima ya mpasi. Beno ke kwikila ti Nzambi ke belula nge? Na yina kulumuka kuna. Kwenda na yinzo, na kukumisaka Nkumbu ya Yandi, na kutubaka, “Matondo na Nge, Mfumu Yesu ya luzolo.”

Mu me simba yawu na nswalu nionso, samu kento yayi vwandaka na mpasi ya mutindu mosi, arthrite.

Nge ke kwikila ti Nzambi ke belula nge? [Mpangi-bakala me tuba, “Yinga.”—Mu.] Mbote mingi, tata. Na yina kulumuka kaka kuna, mpe tuba, “Matondo na Nge, Mfumu Yesu,” mpe vutuka na yinzo.

¹³² Mbote mingi, mpangi-kento, kwenda mpe vutuka na yinzo, mpe kwikila. Nge kele na mingayi na mabolongo ya nge awa, mpe mpasi ya nge ya ntima, mpe nionso yina. Kwenda mpe vutuka na yinzo, tuba, “Matondo na Nge, Mfumu Yesu,” mpe beluka. Kwikila na nionso yina kele na ntima ya nge.

¹³³ Beno ke kwikila? Wapi mutindu samu na beno kuna, beno kuna, beno ke kwikila?

¹³⁴ Mama yina ya fioti kele ya kuvwanda kuna, na bansuki ya ndombe, nge kele na epilepsie, nge ke kwikila ti Nzambi ke belula nge? Nge me ndima yawu? Mbote mingi. Kana nge me ndima yawu, Yandi ke sala yawu.

¹³⁵ Ya kele na mulongi mosi, ya kuvwanda awa, yina ke zola kutambula pene-pene mingi na Nzambi. Mutindu yina ve, tata? Nge ke kwikila ti Nzambi ke sala yawu samu na nge? Telemisa diboko ya nge mpe tuba, “Mu me ndima yawu.” Uh-huh.

¹³⁶ Mama yayi kele ya kuvwanda awa, yina me kulumusa diboko ya yandi. Yandi kele na mpasi ya kimpeve yina yandi ke na kubanza. Ya kieleka.

¹³⁷ Ya kele na mama mosi ya fioti awa, yandi ke kukiyufula kana yandi ke kuzwa bébé. Ya kieleka. Nge me vwandaka na mosi ya balukutakanu ya munu. Mu silaka nge, na nzila ya Nzambi, bébé mosi. Mu silaka yawu ve? Mbote mingi. Na yina vutuka na yinzo mpe baka yawu. Kuvwanda diaka ve na boma samu na yawu.

¹³⁸ Beno ke kwikila na ntima ya beno ya muvimba, beno nionso? Beno nionso ke kwikila? Nkuna ya Abraham ke baka mwelo, mwelo ya mbeni. Beno kele Nkuna ya Abraham, na nzila ya Yesu Klisto? Beno telemisa maboko ya beno kana beno kele mutindu yina.

Na yina beno tentika maboko ya beno na zulu ya nkalani ya beno, na zulu ya mosi na yankaka. Beno tentika maboko ya beno na zulu ya mosi na yankaka. Beno baka mwelo ntangu yayi. Ya kele ya beno. Ya kele samu na beno. “Bisambu ya lukwikilu ke vulusa bambevo. Nzambi ke vumbula bawu.” Mbote mingi, beno sambila mutindu ya beno. Beno sambila mutindu beno ke salaka na dibuundu ya beno. Beno sambila samu na bantu yina kele na beno na ntangu yayi. Beno tentika maboko ya beno na zulu ya mosi na yankaka mpe beno sambila.

¹³⁹ Mfumu Yesu, beto me kwisa na Nkumbu yina ya nene, ya Mazulu ya Nkuna ya Kimfumu, Nkuna ya Abraham, yina silaka Yandi na zulu ya mongo yina kisika Nge pesaka mwana-dimeme; mpe tulaka mwana-dimeme yina na kati ya ntoto ya kuyuma, kima mosi ya mansweki, mutindu mosi Nge salaka na bampadi yina, mazono.

Mu ke sambila, O Mfumu Nzambi, ti Nge ke fidisa Ngolo, lukwikilu. Mpe kubika konso Nkuna . . . Mu zaba ti ba ke sala yawu, Mfumu, samu Nge tubaka, “Nkuna ya Abraham.” Mpe kana ya kele na bayankaka awa yina vwanda banza ti bawu kele Nkuna yango, mpe ba kele ve Nkuna yango, lemvokila bawu samu na ngindu yayi, to dibanza yayi. Mpe bika ti Mpeve-Santu na ntangu yayi kupelisa mioyo ya bawu na lukwikilu ya moyo. Bika ti Mpeve-Santu kukulumuka na kati ya bantima nionso mpe kubelula bantu nionso awa. Ba me tentika maboko ya bawu na zulu ya mosi na yankaka.

Nkuna ya Kimfumu tubaka, “Bidimbu yayi ke landa bayina ke kwikila. Kana ba me tentika maboko na zulu ya bambevo, ba ke beluka.” Mpe Yandi Yina pesaka nsilulu kele awa na ntangu yayi, ke talisa Yandi mosi ti Yandi kele awa. Tala Nkuna kele na maboko ya bawu na zulu ya mosi na yankaka. “Bidimbu yayi ke landa bayina ke kwikila.” Bika ti Mpeve-Santu kunoka mingi na kati ya maboko nionso, na kati ya bantima ya bantu, na kati ya banzutu, mpe belula muntu nionso yina kele na kati ya Mvwandulu ya Kinzambi. Pesa yawu, Mfumu.

Mu ke nganina diabulu. Mu ke nganina kukondwa lukwikilu nionso. Mu ke nganina mpeve nionso ya yimbi. Mu ke nganina mpeve nionso ya luvunu. Mu ke nganina nionso yina me swaswana na Ndinga ya Nzambi. Mpe bika ti Mpeve-Santu kubaka kisika ya Yandi na kati ya ntima ya bantu, na ntangu yayi, na lukwikilu. Bika ti bimbevo nionso mpe maladi nionso, bampasi nionso kukatuka na bantu, na Nkumbu ya Yesu Klisto. Amen.

¹⁴⁰ Ntangu yayi, Nkuna ya Abraham, beno yina kele ya dikanda ya kimfumu, beno yina kele ya nsilulu, na nzila ya lemvo mpe lusalusu ya Nzambi, banani na kati ya beno lendaka telemisa maboko ya beno, beno tuba, “Mu me kuzwa yina mu lombaka.” Matondo na beno. Yawu yina. Yawu yina kikuma ya nsilulu.

Yawu yina kikuma ba pesaka nsilulu, ti beno fwana vwanda kilandi ya bima nionso, na nzila ya Yesu Klisto yina vulusaka beno. Yandi vulusaka beno na disumu. Yandi vulusaka beno na kimbevo. Yandi vulusaka beno na lufwa. Yandi vulusaka beno na difelo. Yandi vulusaka beno na ntoni.

¹⁴¹ Beno ke tuba, “Mpangi Branham, kasi beto nionso ke kwenda na ntoni.” Kasi ntoni lenda ve kukanga beto. Yandi kwendaka kuna, mpe, kasi ya lendaka ve kukanga Yandi. Ya kieleka. Ya lendaka ve kukanga Yandi.

¹⁴² “Mbote, Mpangi Branham, mu me mekama mingi.” Yandi mekamaka, mpe. Kasi Yandi me vulusa beno na mpukumunu.

¹⁴³ “Kubika beto ve na mpukumunu, kasi vulusa beto na yimbi.” Beno me mona, Yandi salaka yawu. Ya me tala beno. Bima nionso kele ya beno, na nzila ya Yesu Klisto. Yandi me pesa beno bima nionso, ya mpamba. Ya kele ve na ntalu samu na yawu, kima mosi ve. Ya kele kaka ya beno na ntangu yayi. Beno ke na kiese ve samu na yawu? Beno ke na kiese ve samu na Yandi? Matondo na Nzambi.

¹⁴⁴ Ntangu yayi, ya ke vwanda na balukutakanu, awa, na nkokila yayi. Yinga. Ya kele na nkokila yayi, na ngunga ya sambwadi na ndambu na nkokila yayi. Mu ke bika pasteur ya beno kutuba na beno. Kwisa. Kwisa.

Ntangu yayi, Lumingu ke kwisa na suka, kana Mfumu ya mbote kuzola, mu ke vutuka samu na kusambila samu na bambevo, na tabernacle, to konso kisika.



KUBAKA MIELO YA MBENI KNG59-1108

(Possessing The Enemy's Gates)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 8 ya Ngonda ya kumi na mosi, na mvula 1959, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org